

# গৌরী

শ্রীযতীন্দ্রমোহন সেনগুপ্ত



গুরুদাস চট্টোপাধ্যায় এণ্ড সন্স,  
২০৩১১ কৰ্ণওয়ালিস্ ষ্ট্রীট, কলিকাতা

# একটাকা

চতুর্থ সংস্করণ

গুরুদাস চট্টোপাধ্যায় এণ্ড সন্সের পক্ষে ভারতবর্ষ প্রিন্টিং ওয়ার্কস্ হইতে  
শ্রীগোবিন্দপদ ভট্টাচার্য্য দ্বারা মুদ্রিত ও প্রকাশিত  
২০৩।১।১ কর্ণওয়ালিস্ স্ট্রীট, কলিকাতা।

## উৎসর্গ পত্র

এক আশ্বিনের প্রথম দিনে তুই যখন এলি, তখন আকাশ শরতের নিখিল আলোয় হাসছিল ; বাতাস শেফালির কোমল গন্ধ বহন করে আনছিল ; আর চারিদিককার প্রকৃতির বৃকের উপর শারদ-লক্ষ্মীর চরণ-পদ্মের ছাপ লেগে শুভ সূচিত হচ্ছিল ! তার পরই কার্তিকের এক ঝড়বাদলের রেতে তুই চলে গেলি, গৌরী !

বিচিত্র দুনিয়ার সবাই আজ তোকে ভুলে গেছে ; কিন্তু তোর সেই যাওয়ার সময়কার অক্ষুট কাকুতি, আর তোর বেদনায় ম্লান দুই চোখের অসহায় কাতর দৃষ্টিটুকু, আমি যে এতদিনেও কোনও মতেই ভুলতে পারিলাম না ।

সে কি, ওরে, মানুষ কত বড় অসহায়, আর কত ক্ষুদ্র, তুচ্ছ তার শক্তি, এই সব চেয়ে বড় সত্য কথাটা জানিয়ে দিয়ে গিয়েছিলি বলেই ?

সেনহাটী

“মনোমোহন পাঠাগার”

৬ই কার্তিক, ১৩২৮ সাল



# গৌরী

২

“বৌদি’ ঘরে আছ ?”—শিশির বারান্দায় উঠিতে উঠিতে ডাকিল।

“কে, শিশির আমাকে ডাকছ ?”—একটি হাস্যপ্রফুল্লমুখী নারী দুয়ারের কাছ পর্যন্ত আসিয়া কহিল।

“দাদার চিঠি এসেছে,—দেখ ত, আমার কথা কি লিখেছেন”—

স্বামীর চিঠি আসিয়াছে শুনিয়া, গৌরীর বুকের মধ্যে যে শোণিত-প্রবাহটা এতক্ষণ শান্তভাবেই প্রবাহিত হইতেছিল, সেই শোণিত-প্রবাহটা একটু চঞ্চল হইয়া উঠিল। একটা ক্ষণিক ক্ষত শোণিতোচ্ছ্বাস স্রগোর মুখখানিকে একটু রঞ্জিত করিয়া দিয়া গেল। চক্ষু দুইটি একটু নত হইয়া আসিল।

## গৌরী

শিশির তাহা লক্ষ্য করিতে পাবিল না। সে দ্রুত চঞ্চল-  
কণ্ঠে কহিল, “বাহা—রে!—চিঠি পড় শীগ্গিব, হাতে করে  
দাঁড়িয়ে থাকলে ত আমাব কাজ হবে না!”—

ইতিমধ্যে গৌরীৰ বুকেৰ দ্রুত স্পন্দনটা কিছু শাস্ত হইয়া  
আসিয়াছিল। সে তাহাব দেববাটিৰ অস্থিৰতা লক্ষ্য কৰিয়া  
মুহু হাসিয়া কহিল, “তা’ তোমাব এত গরজ যদি, চিঠি খুলে  
এতক্ষণ পড়্লেই ত পাৰ্হতে!”—

শিশিব হাসিয়া উঠিল, কহিল, “আমি নাকি পবেৰ চিঠি  
খুলে পড়্ৰ!—বোদি’ বলে কি?”—

“আমি কি তবে তোমাব ‘পব’ হ’লাম শিশিব?”—গৌরী  
তাহার স্বৰটা একটু গাঢ় কবিবাব চেষ্টা কৰিতেছিল; কিন্তু  
শিশিবেৰ মুখেৰ বিস্মিত ভাব ও তাহাব বিস্ফাবিত চক্ষু দুইটা  
দেখিয়া সে হাসিয়া ফেলিল!

শিশিব কহিল,—“বাঃ,—আমি বুঝি তাই বল্লাম!—  
তুমি পর হতে গেলে কেন? আমি বল্ছিলাম কি,”—

“—কি তুমি বল্ছিলে?”

“যাও, তুমি হাস্ছ, কারু চিঠিই দেখ্তে নেই,—এই  
অন্তের চিঠি”—

“তা, ‘অন্ত’ত ‘পর’—নয় কি?”—

## গৌরী

—“কি মুন্সিল, কারু চিঠি আর কারুর দেখতে নেই,—  
বিশেষ খামের চিঠি !”—

বৌ-দিদি যে ‘পর’ কথাটাকে অমন শক্ত করিয়া  
ধরিয়াছে, তাহাতে শিশির ভারি একটা অস্বস্তি বোধ  
করিতেছিল।

“তা’ আমি বললে তো আর বাধা নেই, তুমি খুলে  
পড় !”—

শিশির বিপদে পড়িল। বৌদি নিশ্চিন্তভাবে তাহাকে  
চিঠি খুলিয়া দেখিতে বলিল, সে তাহা পারিল না।  
তখন সে মিনতির স্বরে কহিল, “তোমার দুটি পায়ে পড়ি  
বৌদি, দাদা আমার কথা কি লিখেছেন, তুমি চিঠি পড়ে বল !”

একটু হাসিয়া গৌরী চিঠি খুলিয়া পড়িল, তারপর  
শিশিরের হাতে গুঁজিয়া দিয়া কহিল, “এইবার পড়ে দেখ,  
তোমার কথা কাজে লাগল না, আমি তা’ আগেই বলেছিলাম !”

শিশিরের প্রকাণ্ড চক্ষু দুইটা ভরিয়া জল আসিতেছিল,  
সে অভিমানের স্বরে কহিল,—“তবে ছাই ও চিঠি আমি  
পড়ব না !—আমি বুঝতে পারছি, এর মধ্যে তুমি এক  
চাল দিয়েছ, বৌদি,—তুমি আমার পক্ষ হ’লে দাদা অন্যত  
কল্পতেন না”—

## গৌরী

“হাঁ, তা’ ত বল্বেই এখন, আমি ‘পর’ কি না,—তোমার দাদাটি ভাল, আর দোষ হ’ল যত আমার ! তা’ তুমি চিঠিখানি একবারটি পড়েই দেখ না শিশির, তার পর আমার দোষ দিও !”—গৌরীর ওষ্ঠপ্রান্তে একটু হাসির রেখা মুখখানিকে ঈষৎ উজ্জ্বল করিয়া তুলিতেছিল !

তখন শিশির চিঠি তুলিয়া লইয়া পড়িল ; পড়া শেষ হইলে চিঠিখানি গৌরীর সম্মুখে ছুঁড়িয়া ফেলিয়া দিয়া কহিল—  
“ইঃ—ভারি কি না লিখেছেন ! আমি ছোট বলে কেউ আমার কথা গ্রাহিই করে না ! তুমি দাদার পক্ষে—তুমি দাদার পক্ষে ! তা’ আমি বেশ বুঝ্তে পাচ্ছি ! চল্লাম আমি দক্ষিণ-পাড়ায়, সেখানে আজ আমাদের ‘ক্লাব’ আছে ! দুপূর্ব ঘুরে না গেলে আর আস্ছি নে, থেকে ভাত নিয়ে বসে, দাদার পক্ষে যাওয়ার মজাটা টের পাবে এখন !”

শিশিরের আহার না হওয়া পর্য্যন্ত গৌরী বে উপবাসী থাকিবে, তাহা শিশির বিলক্ষণ জানিত । একটু ছোট থাকিতে দ্রুত শিশির গৌরীকে এমনি করিয়া মধ্যে মধ্যে ভয় দেখাইয়া বাড়ী হইতে বাহির হইয়া যাইত ; তারপর বৌদিদির কষ্ট হইবে ভাবিয়া ঘণ্টা-খানেকের মধ্যেই বাড়ী ফিরিয়া আসিয়া আহার করিত এবং একটা নূতন আব্দার ধরিয়া গৌরীকে ব্যতিব্যস্ত



## গৌরী

করিয়া তুলিত ! কিন্তু ইদানীং একটু বড় হইয়া এমনটা আর বহুদিন করে নাই ।

আজ নাকি শিশির বড় রাগিয়া গিয়াছিল, তাই বৌদিদিকে ছেলেবেলার মতই জল্প করিবে বলিয়া বাড়ী হঠতে বাহির হইয়া পড়িবার জন্ত দ্রুতপদে উঠানে নামিয়া আসিল ।

গৌরী হাসিতে হাসিতে ডাকিয়া কহিল, “ওবে পাগলা—ও শিশির ! ওবে আমার মাথা খা’স্ যা’স্নে । এতটা বেলা হয়েছে, একটু কিছু খেয়ে যা’ !”—

বৌদিদির কথা শুনিয়া শিশির ফিরিয়া দাঁড়াইল, কহিল, “তোমার অত বড় মাথাটা নাকি আমি খেতে পারি ? তা’ ভাত আমি সেই দুপুরের পব ছাড়া খাচ্চিনে,—বুঝ্বেই এখন মজাটা কেমন ।”—

“তা’, ভাত না খাস্, যা’ এখন দি’ তা ত খেয়ে যা’ !”—

গৌরী ঘরে যাইয়া একটা পাথুরে বাটিতে করিয়া কিছু মুড়ি, খানিকটা ঘবে-পাতা দধি ও কয়েকটা কলা লইয়া আসিল ! বাবান্দায় একখানা ছোট আসন পাতিল, তাবপব ব্লেহতরলকণ্ঠে ডাকিল, “লক্ষ্মী দাদা আমার, কিছু খেয়ে যাও, নইলে আমার মনটা অস্থির থাক্বে এখন, কোনও কাজই করিতে পারব না !”—

বাবান্দায় উঠিতে উঠিতে শিশির তাহার ক্ষুদ্র অধর

## গৌরী

উলটাইয়া কহিল,—“ইঃ, ভারি লক্ষ্মী কি না !—মেয়েগুলোই লক্ষ্মী হয়,—ছেলেদের লক্ষ্মী হওয়ার জন্ত ভারি দায় পড়ে গেছে !”—

মুহূর্ত্তমধ্যে আসনের উপর বসিয়া পড়িয়া শিশির আহাবে মনোযোগ দিল। গোবী সন্মুখে দাঁড়াইয়া ছবস্ত দেবরটির ধাওয়া ব্ৰহ্মাশ্র-সজ্জল-চক্ষে দেখিতে লাগিল।

ধাইতে ধাইতে শিশির কহিল, “বেশ দৈ, বোদি’, আর আছে ?”

গৌরী হাসিয়া কহিল,—“আছে,—দেব ?”—

—“দেবে না ত কি তোমার জন্তে রাখবে ?”—

গৌরী দধিব পাত্রটা ধরিয়াই লইয়া আসিল ; শিশিব চাহিয়া দেখিল, বেশী নাই ! এক চামচ দিতেই শিশিব তাহা হাত পাতিয়া লইল, একটু মুখে দিয়াই কহিল, “ইস্, এগুলি টকে গেছে,—আমি আর নেব না !”—

দেবরটির ভাব দেখিয়া গৌরী হাসিতে হাসিতে কহিল, “এরি মধ্যে ট’কে গেল, শিশির ? আর একটু দি !”—এই কত রযেছে !”

“রযেছে ত রযেছে ;—আমি আর নেব না !”

সস্তানহীনা গোবী তাহার ছবস্ত দেবরটির উপরেই তাহার ক্ষুধিত মাতৃহৃদয়ের সমস্ত স্নেহধারা বর্ষণ করিয়াছিল ! তাহার

## গৌরী

আন্ধার প্রতিপালন করিয়া, তাহার দুরন্তপণা সহ্য করিয়া গৌরী পবন তৃপ্তিলাভ করিত ।

যেদিন শিশির কোনও আন্ধার না করিত, সে দিনটা গৌরীর কাছে ব্যর্থ মনে হইত ! যেদিন শিশির শাস্ত্রশিষ্টভাবে দিনটা কাটাইয়া দিত, সেদিন গৌরীর বুকের মধ্যে কোথায় যেন একটা মৃদু বেদনা, একটু অস্বস্তি জাগিয়া উঠিত !

শিশির যখন এতটুকু ছোটটি ছিল, তাহার তখনকার আবদাবের, দুরন্তপণার ইতিহাসটি শ্রবণ করিয়া, আলোচনা করিয়া, গৌরীর হৃদয় পুলকে চঞ্চল হইয়া উঠিত, চোখের কোণে স্নেহাশ্রুবিन्दু সঞ্চিত হইত !

কিন্তু শিশিব যে এখন বড় হইয়া উঠিতেছে ! আর ত সে ছেলেবেলাব মত আবদাব করিয়া, সময়ে অসময়ে দুরন্তপণা কবিয়া ব্যতিব্যস্ত কবিয়া তুলে না !

তাই, কতদিন পবে শিশিবেব আঙ্গকাব এই অভিমানটুকু, আবদারটুকু, গৌরী বড় ভাল লাগিতেছিল । তাহার বুকের মধ্যে একটা বিপুল মেহোচ্ছ্বাস জাগিয়া উঠিয়া তাহার ক্ষুধিত মাতৃহৃদয়খানিকে আচ্ছন্ন কবিয়া দিতেছিল ।

তাহাব অধবপ্রান্তে মৃদু হাসির বেখা, নয়ন-কোণে স্নেহাশ্রুবিन्दু জাগিয়া উঠিয়াছিল ।

## গৌরী

গৌরী একদৃষ্টিতে ঐ দূরন্ত ছেলেটির স্বগৌর মুখখানির দিকে চাহিয়া চাহিয়া তাহার খাওয়া দেখিতেছিল। আহাৰ শেষ করিয়া, জলের গেলাস মুখের কাছে তুলিয়া ধরিয়া শিশির গৌরীর মুখের দিকে চাহিল, দেখিল, তাহার চোখের কোণে অশ্রু ; গেলাস নামাইয়া ক্ষুণ্ণস্বরে শিশির কহিল, “বোদি,” তোমার চোখে জল কেন ?”

গৌরী হাসিয়া কহিল, “তুই দৈ খেলি না কেন ?”

শিশির বিস্মিতভাবে কহিল, “বাঃ, এই যে কতটা খেলাম ? আচ্ছা, যেটুকু আছে, তোমার সঙ্গে বসে ভাত দিয়ে খাব এখন,” —

গৌরী হাসিয়া উঠিল

শিশিরও অপ্রতিভভাবে একটু হাসিল। হাত মুখ ধুইয়া শিশির কহিল, “বোদি, দা’খানা দাও ত !”

“কেন রে, দা’ দিয়ে কি হবে ?”

—“পাতা কাটব !”—

গৌরী হাসিয়া কহিল, “বৌ আন নাই, ভাত খাবে কে ?”—

“বৌকে পাতা কেটে আমি ভাত খাওয়াব না,—সে পার ত তুমিই খাইও !—না, সত্যি, দা’খানা দাও, তোমার কুমড়া গাছটার মাচা করে দেব ?”

## গৌরী

—“কেন, ক্লাবে যাবি না?”

সপ্রতিভ শিশির উত্তর দিল, “সে যেতে হয় বিকাল-বেলা দেখা বাবে!”—

‘ক্লাবে’ যাইতে হইবে, এবং দুপুর কাটিয়া গেলে বাড়ী আসিয়া বৌদিদিকে দাদার পক্ষালম্বনের জন্ত জঙ্গ করিতে হইবে, সে কথা শিশির একেবারেই ভুলিয়া গিয়াছিল।

গৌরী ঘরের ভিতর হইতে দা’ আনিয়া দিলে, সেই বলিষ্ঠ বালক, বৌদিদির কুমড়াগাছে মাচা করিয়া দিবার জন্ত একটা আস্ত বাঁশ টানিয়া আনিয়া থণ্ড করিতে লাগিয়া গেল।

গৌরী ডাকিয়া কহিল, “ওরে হাতে চোট লাগে না যেন,—”

ওষ্ঠ উন্টাইয়া শিশির কহিল, “ইঃ, চোট লাগে আর কি! তুমি বাও তোমাব কাজে! নারকেলের বড়ি ভেজ কিস্ত—বুঝ্লে?”

গৌরী চলিয়া গেল।

শিশিরের যখন পাঁচ বৎসর বয়স তখন তাহার মাতা-  
ঠাকুরাণী স্বর্গগত হইলেন। গৌরীর বয়স তখন পনের বৎসর।  
তার চারি বৎসর পূর্বে সে প্রথম এই সংসারে প্রবেশ করে।  
শিশিরের জ্যেষ্ঠ ভ্রাতা শচীনের সঙ্গে গৌরীর বিবাহেব কিছু-  
দিন পরেই, পিতার কাল হওয়াতে, সংসার-প্রতিপালনের ভাব  
শচীনের উপরেই পড়ে। স্মৃতবাং তাহাকে কলেজ ছাড়িয়া  
চাকুরীর চেষ্টা করিতে হয়। পঠদশায় শচীনের হৃদয়ে কতকগুলি  
উচ্চ আশা ছিল, পিতৃবিয়োগের পর সে গুলি ছিপিখোলা  
শিশিস্থ কর্পূরের মতই উড়িয়া গেল।

কলেজেব অধ্যক্ষ তাহাকে যথেষ্ট স্নেহ করিতেন; তাঁহাবই  
সুপারিশে কলিকাতার এক সদাগরী আফিসে চল্লিশ টাকা  
বেতনের একটি কেরানীগিরি জুটিল; কয়েক বৎসবে বেতন কিছু  
কিছু বাড়িয়া ৫৫ টাকা হইয়াছিল। সংসারের অবস্থা  
কোনও দিনই তেমন স্বচ্ছল ছিল না; পিতামাতার আত্মাদিতে  
কিছু ধারকর্জ, দোকানদেনাও হইয়াছিল। এই সামান্য আয়  
হইতেই সমস্ত শোধ হওয়া দরকার। স্মৃতবাং কলিকাতার

## গৌরী

মেস-থরচ বাদে যাহা উদ্ভূত হইত, শচীন প্রাণান্তেও তাহা হইতে একটি পয়সাও অন্য কোনও ব্যয় করিতে চাহিত না। বাড়ীতে সংসার-থরচের জন্য যে নির্দিষ্ট টাকা কয়েকটি পাঠাইত, গৌরী পাকগৃহিণীর মতই তাহা দ্বারা সংসারটি বেশ গুছাইয়া চালাইয়া লইত।

বাড়ীর চারিধারের জমিটুকু, কিছু টাকা থরচের উপর হইতে বাঁচাইয়া, গৌরী বেশ কবিয়া ঘিরিয়া লইয়াছিল। ক্ষুদ্র সংসারটির উপযুক্ত নানা প্রকার তরকারী শাকশব্জি গৌরীর যত্নে সেখানেই জন্মিত। বাড়ীখানির কোথায়ও বাজে জঙ্গল ছিল না; ঘব-দুয়ারগুলি পরিষ্কার পবিচ্ছন্ন সাজান গুছান! কোথায়ও এতটুকু ত্রুটি লক্ষিত হইত না। কাহাব নিপুণ হস্ত বাড়ীখানিকে সুন্দর করিয়া রাখিবার জন্য যেন সর্বদাই নিযুক্ত রহিয়াছে, তাহা দেখিলেই বুঝা যাইত।

কমলা কখন স্বয়ং আসিয়া, বাড়ীখানির উপর তাঁহারই চরণস্পর্শ দিয়া গৌরীকে ছুঁইয়া আশীর্ব্বাদ করিয়া গিয়াছেন; তাঁহাবই মায়া স্পর্শ পাইয়া, সমস্ত বাড়ীখানি গৌরীকে কেন্দ্র করিয়া, কমলার পাদপীঠ শতদলটির মতই অপূর্ব্ব শ্রীসম্পন্ন হইয়া উঠিয়াছিল।

সংসারে এক বৃদ্ধা পিসি ছিলেন, তিনি ভ্রাতার ও ভ্রাতৃ-

## গোবী

বধূর মৃত্যুর পর তাঁহার হবিনামের মালাটিই সম্বল করিয়া লইয়াছিলেন। বাড়ীর পাশে একটি অনাথা বর্ষাঘসী জ্বীলোক ছিল, তাহাকে থাইতে দিবার কেহ না থাকাতে গোবী তাহাকে সংসারভুক্তা করিয়া লইয়াছিল। সে সংসারের অনেক কার্যে গোবীর সহায়তা কবিত। এই দুইটি বৃদ্ধা এবং গোবী ও শিশিবকে লইয়া এই ক্ষুদ্র সংসারটি রচিত হইয়াছিল। শিশিবের একটি ভগিনী ছিল, তাহার নাম 'শ্রী'। পিতামাতা জীবিত থাকিতেই শ্রীব বড়-ঘরে বিবাহ হইয়াছিল। শ্রী বৎসরের মধ্যে দুই একবার পিত্রালয়ে আসিত, কোনও বৎসব আসিতও না।

শচীনের পিতামাতার মৃত্যুর পব নয় বৎসর কাটিয়া গিয়াছে। শিশিব এখন চৌদ্দ বৎসরের গোবদেহ বলিষ্ঠ কিশোর, তাহার বাল্যের চঞ্চলতা অনেকটা কাটিয়া গিয়াছে, কিন্তু গোরীর কাছে তাহার শিশুটির মতই আবদার, দ্রবস্তপণা এখনও দৃব হয় নাই। পনের বৎসরের বালিকা যেদিন পাঁচ বৎসরের মাতৃহীন শিশুব লালনপালনের ভার গ্রহণ কবিয়াছিল, সেইদিন হইতেই সে তাহার বিপুল স্নেহপূর্ণ হৃদয়খানি সেই অবোধ শিশুটির দিকেই একান্তভাবে প্রসারিত কবিয়া দিয়াছিল। বয়োবৃদ্ধির সঙ্গে সঙ্গে তাহার ক্ষুধিত মাতৃহৃদয় যতই উন্মুখ, আকুল হইয়া উঠিতেছিল,—ততই সে এই মাতৃহীন দ্রবস্ত



## গৌরী

বালকটিকেই বুকের কাছে টানিয়া লইয়া সম্মানহীনতার দুঃখ ও দৈন্ত্য ভুলিতে চাহিতেছিল !

শিশির যখন তাহার সমস্ত স্নেহমমতা-টুকুই একেবারে নিঃশেষ করিয়া আকর্ষণ করিয়া লইল, তখন গৌরীর হৃদয়ে আর কোনও ক্ষোভই রহিল না, সে সত্যই দেখিল পরম তৃপ্তিতে তাহার অন্তর পরিপূর্ণ হইয়া গিয়াছে ।

গ্রামে একটি ভাল ইংরাজী বিদ্যালয় ছিল ; শিশির সেই বিদ্যালয়েই পড়িত । ভাল ছেলে বলিয়া স্কুলে তাহার নাম ছিল, শিক্ষকেরা তাহার অনেক ভরসা রাখিতেন । সুতরাং শিশির যখন চৌদ্দবৎসর বয়সেই প্রবেশিকা-পরীক্ষায় উত্তীর্ণ হইয়া কুড়ি টাকা বৃত্তি পাইল, তখন কেহই তেমন বিস্মিত হন নাই !

বৃত্তি পাওয়ার খবর আসিতেই শিশির এক প্রস্তাব করিয়া বসিল । কলেজে পড়িবার জন্য যখন তাহাকে কলিকাতা যাইতেই হইবে,—তখন মেসে না থাকিয়া, ছোট একটা বাসা যদি করা যায়, তাহা হইলে সকলে মিলিয়া দাদার সঙ্গে একত্রে থাকার সুবিধা হয় । তাহার বৃত্তির টাকা ও দাদার বেতন বৌদিদির হাতে দিলে তিনি যে স্বচ্ছন্দে কলিকাতার বাসাধরচ চালাইয়া লইতে পারিবেন, এবিষয়ে শিশিরের বিন্দুমাত্র সন্দেহ

## গৌরী

ছিল না ! বৌদিদিকে ছাড়িয়া সে যে কলিকাতার মেসে পড়িয়া থাকিতে পারিবে না, ইহাও সে তাহার বৌদিদির কাছে দৃঢ়কণ্ঠে বারংবার ঘোষণা করিতেও ছাড়িল না ! প্রস্তাব শুনিয়া প্রথমে গোবীরও খুব ভাল লাগিয়াছিল । কিন্তু কথাটাকে যতই সে মনে মনে আলোচনা করিতে লাগিল, ততই তাহার মনে হইতে লাগিল, শিশিরের এই সঙ্কল্পটিকে কার্য্যে পরিণত করার পক্ষে বহু বাধা রহিয়াছে !

শচীনের মাতা তাঁহার মৃত্যুর পূর্বেক্ষণে শচীন ও বধূকে ডাকিয়া বলিয়াছিলেন, “এ ভিটেয় সন্ধ্যা জালাব ভার তোমাদের উপর ! লক্ষ্মী মা, আমার স্বপ্তরের ভিটে অন্ধকাব করে কোথায়ও যেও না ।”—

মরণপথযাত্রিনীর এ আদেশ লঙ্ঘন করা সম্ভব নহে ; তারপর এই সাজান-গুছান বাড়ীখানি ছাড়িয়া কয়েক বৎসরের জন্তে বিদেশে গেলে এ বাড়ীর যে আব কিছুই থাকিবে না ।

এই বাড়ীর সঙ্গে, ইহার প্রত্যেক গাছপালার সঙ্গে, কত সুখের, দুঃখের, বেদনার কাহিনী জড়িত রহিয়াছে ! গোবীব স্বহস্তে রোপিত গাছগুলির, লতাগুলির প্রত্যেকটিই যে তাহার সম্মান-তুল্য ! তাহারা যে গৌরীর কাছে শুধু জড় বৃক্ষ-লতা-শুল্কই নহে ; গৌরী যদি চলিয়া যায়, তুলসীমঞ্চ নিত্য সন্ধ্যায়

## গৌরী

প্রদীপ জলিবে না, গৃহদেবতার ভোগ হইবে না, সে নিজহস্তে পূজার ডালি গুছাইবে না, সাজাইবে না, পরস্মিনী গাভীটি যে প্রতি সন্ধ্যায় দুয়ারে আসিয়া তাহার মুখের দিকেই চাহিয়া সুস্পষ্টস্বরে “ও—মা—” বলিয়া ডাকে ! বাহাকে সে নিজে খাবার না দিলে খায় না, তাহাকে কাহার কাছে রাখিয়া যাইবে ? খাঁচার ময়নাটি ‘মা’ ডাকিতে শিখিয়াছে, গৌরী জল না দিলে, খাবার না দিলে, সে খায় না,—সেই প্রিয় পাখীটিকে কোন্ আকাশে উড়াইয়া দিয়া যাইবে ? বিড়ালটার ছানাগুলির কেবল চক্ষু ফুটিয়াছে,—গৌরী যদি চলিয়া যায়, বিড়ালী ছানাগুলিকে লইয়া কাহার আশ্রয়ে যাইবে ?

এত কথা ভাবিতে গৌরীর দুই চক্ষু অশ্রুপূর্ণ হইয়া উঠিত ! কিন্তু সকলের উপরে সে যে শিশিরের কাছে থাকিতে পারিবে, তাহাই মনে করিয়া সমস্ত বন্ধন, সমস্ত মায়া কাটাইয়া উঠিবার জন্য একটা আগ্রহ তাহার অন্তরের মধ্যে প্রবলভাবেই উন্মুখ হইয়া উঠিত !

কিন্তু কাহার মতের উপর সমস্ত নির্ভর করে, তিনি যে এ প্রস্তাবে স্বীকৃত হইবেন, তাহা গৌরীর একবারটিও মনে হইত না, সব বন্ধন কাটান সম্ভব হইতে পারিত, কিন্তু জননীর অস্তিমশয়ার আদেশ লঙ্ঘন করা,—না, তাহা কোন মতেই সম্ভব হইবে না ।

## গৌরী

তবু শিশিরের গীড়ানীড়িতে গৌরী স্বামীকে সব কথা খুলিয়া লিখিল, গৌরী যাহা ভাবিয়াছিল, তাহাই হইল ; শচীন বাড়ী ছাড়িয়া কলিকাতায় যাওয়ার পক্ষপাতী নহে । বিশেষ জননী তাঁহার অস্তিমশয়্যায় যে আদেশ করিয়া গিয়াছেন, তাহা লঙ্ঘন করা অসাধ্য !

গৌরী শচীনের পত্র পড়িবার জন্ত শিশিরকে দিল, শিশির তাহা একবারটি দেখিয়াই গৌরীর সম্মুখে ছুড়িয়া ফেলিয়া দিল !

শিশির দেখিল, তাহার কথা কোনও কাজেই লাগিল না ; তখন সে বড় গোল বাধাইল । গৌরীর উপর অভিমান করিয়া, গৌরীর সঙ্গে ঝগড়া করিয়া, নূতন নূতন আশার ধরিয়া, গৌরীকে ব্যতিব্যস্ত করিয়া তুলিল ।

শিশির বাহিরে দিগ্বিজয়ী ; শিশির বিদ্যালয়ের আদর্শ ছাত্র ; গ্রামের ছেলেদের সম্রমের পাত্র । কিন্তু বাড়ীতে গৌরীর কাছে শিশির সেই পাচবৎসরের শিশুটির মতই অস্থির দুঃস্থ ।

সংসারে শুধু একটি মানুষই ছিল ;—সে ঐ গৌরী, যাহার কাছে আসিয়া, শিশির নগ্ন, সরল কোলের শিশুটির মতই ঝাঁপাইয়া পড়িত !

## গৌরী

গৌরী কহিল, “তা তুই যখন এতটা বাড়াবাড়িই করছিস, তখন আমি না হয় আর একবার লিখে দি,”—

শিশির বামচক্ষুর প্রান্তটা একটু সঙ্কুচিত করিয়া জুত, অভিমানক্ষুর স্বরে কহিল, “হঁ, তা’ লিখ্বে বই কি ! ‘তুমি সাপ হয়ে কাট, আবার রোজা হয়ে ঝাড় !’—তুমি লেখ, আর দাদা ভাবুক, ‘বুড়োছেলে বৌদিদিকে ছেড়ে থাকতে পারে না !’ ওগো, তা’ আমি থাকতে পারব,—পারব !—”

শিশিরের স্বর গাঢ় হইয়া আসিল, চক্ষু দুইটা জলে ভরিয়া গেল ; সে তাড়াতাড়ি মুখ ফিরাইয়া লইয়া দাঁতে ওষ্ঠ চাপিয়া, আসন্ন ক্রন্দনের বেগটাকে রোধ করিতে চাহিল ।

গৌরীর চক্ষুও অশ্রুসিক্ত হইয়া উঠিল ; কয়েকদিন পরেই শিশির কলিকাতায় চলিয়া যাইবে বলিয়া গৌরীর মনটা ভার হইয়াই ছিল, আজ শিশিরের কথায় হঠাৎ তাহার বুকের মধ্যের রুদ্ধ আবেগটা সজোরে ঠেলিয়া বাহির হইতে চাহিল । সে কোনমতেই অশ্রু রোধ করিতে পারিল না । শিশিরকে কোলের কাছে টানিয়া আনিয়া কম্পিতকণ্ঠে তাহার মাথায় হাত বুলাইতে লাগিল । তাহার দুই গুণ প্রাবিত করিয়া বিন্দুর পর বিন্দু অশ্রু নামিয়া আসিতেছিল

সুদীর্ঘ ছয় বৎসর কাটিয়া গিয়াছে । ইহার মধ্যে শিশির এম, এ, পরীক্ষায় শীর্ষস্থান অধিকার করিয়াছে । পরীক্ষার ফল বাহির হওয়ার অল্পদিন পরেই শিশির একটি সরকারী কলেজে অধ্যাপক নিযুক্ত হইয়াছে ।

পরবর্তী গ্রীষ্মাবকাশে শিশির বাড়ী আসিয়াছে ।

মধ্যাহ্ন অতীতপ্রায়, গ্রীষ্মের দীর্ঘ দিবা কাটিতে চাহে না । পল্লীর শ্রামল বনচ্ছায়ায় পাখীর গান বিরল হইয়াছে । গৃহেব অলিন্দে কপোত-মৃগলের মৃদল কুজন, আত্মবৃক্ষের ঘন পল্লবাস্তবাল হইতে ঘুঘুর উদাস সুর, অন্তরমধ্যে একটা স্বপ্নালোক রচনা করিয়া তুলিতেছিল ; কোথায় যেন একটি অতীত স্মৃতির পুস্ক-ব্যাকুল করুণ সুর বড় মৃদু মধুর বাজিতেছিল, সেই সুরটিকে যেন ধরা যাইতেছে না, বুঝা যাইতেছে না । তবু অন্তর একটা অনির্দিষ্ট স্মৃতির কুণ্ডায় ও বেদনায় রহিয়া রহিয়া শিহরিতেছিল ।

শিশির একটা টেবিলের কাছে বসিয়া বসিয়া একথানা

## গৌরী

বান্দালা বহির পাতা উল্টাইতেছিল ; কপোতের কুজন, ঘুঘুর উদাস সুর, তাহারও অন্তরে একটা সাড়া দিতেছিল। বহির লেখায় মনঃসংযোগ হইতেছিল না। শিশির হঠাৎ বহি ফেলিয়া দিয়া, চেয়ার সরাইয়া উঠিয়া দাঁড়াইল, ডাকিল, “বৌদি,”—

গৌরী সেই কক্ষের মধ্যেই একটু দূরে বসিয়া পান সাজিতেছিল। আহ্বান শুনিয়া সে তাহার শাস্ত দৃষ্টি উৎসারিত করিয়া শিশিরের দিকে চাহিল, “কি শিশির, ডাকলে ?”—

“বৌদি’, দাদা এলে কাল তুমি সব কথা শুছিয়ে বলবে ত ?”—

গৌরী চক্ষু একটু নত করিয়া মৃদুস্বরে কহিল, “তা’ বলব, কিন্তু”—

—“কিন্তু কি, বৌদি ?”—

একটা বাধা পাওয়ার সম্ভাবনা দেখিয়া শিশিরের রাগ হইতেছিল ; রাগটা সে টেবিলের উপরকার বান্দালা বহিখানির উপর ঝাড়িল ; বহিখানি তুলিয়া লইয়া, একটু জোরে আবার টেবিলের উপরেই ফেলিয়া দিল।

গৌরী হাসিল, কহিল, “তা’ ও বইটার উপর রাগ করলে কি হবে ?—তুমি নিজে বলতেও ত পারবে,—এখন ত আর ছোটটি নও,”—

## গৌরী

—“তা’ হলে আর তোমার দোহাই দিচ্ছি কেন ?—তুমি পারবে কি না তাই স্পষ্ট করে বল,”—

শিশিরের অস্থিরতা দেখিয়া গৌরী ক্রমাগতই মূঢ় মূঢ় হাসিতেছিল। গৌরীর হাসি দেখিয়া শিশির চটিয়া গেল।

—“যা’ বলব তা’ ত পারবেই না, পার শুধু হাসতে !”—

গৌরী হাসিয়া কহিল, “আচ্ছা শিশিব, তুই কলেজে ছেলেদের পড়াস্ কেমন করে ?—তারা তোকে মানে ?”—

শিশির এবার হাসিয়া উঠিল। “কেন, তা’ বলছ কেন, বোদি’ ?”—

“তুই এখনও যেন ছোটটিই আছিস্ ! তেমনি অস্থির, তেমনি চঞ্চল !—তাই আমার মনে হয়, ছেলেগুলো তা’দের এই ছোট্ট অধ্যাপকটিকে মানে কি না !”—

ছেলে-মহলে শিশিরের সম্মম কতটুকু, তাহা আর সে ভানাইয়া রলিল না ! গৌরী তাহা বখেটেই জানিত ! শিশিব শুধু একটু হাসিল, তারপর দু’ একবার গলাটা একটু ঝাড়িয়া লইয়া কহিল, “সে কথা যাক্, আমি যা’ বলি শোন, তুমি বেশ ক’রে বুঝিয়ে বলে স্বীকার করাও, তিনি যদি চাকুরী ছেড়ে দিয়ে সত্যি বাড়ী এসে না বসেন, আমি আমার কাজ ছেড়ে দেবই !”



## গৌরী

গৌরী হাতের পান বাটার উপর রাখিতে রাখিতে कहिल,  
“তা’ তুমিই সাম্না-সাম্নি মীমাংসাটা ক’রে ফেলনা কেন ?—  
আমার দোহাই কেন ?”—

—“সে আমার সাহসে কুলায় না, বৌদি’ ! দাদার সাম্নে  
বেশী জেদ্ করে কোনও কথা বলা আমার দ্বারা হবে না আমি  
বলে রাখছি ;—ও তোমাকেই বলতে হবে, এবং ব্যবস্থা করে  
দিতে হবে ;—নইলে আমি চাকুরী ছেড়ে দিয়ে বাড়ী বসে  
থাকব, তা’তে তোমার এতটুকুও সন্দেহ করবার নেই কিম্ব !”—

“শোন একবার পাগল ছেলের কথা ! সবাই চাকুরী  
ছেড়ে এসে বসবি, সংসার চলবে কি করে ?”—

“তুমি ৪০।৫০ টাকা আয়ের দিনে যদি সংসার চালাতে  
পেরে থাক, দাদা চাকুরী ছাড়লেও আমি ২৫০ টাকা পাব,  
তা’তেও তোমার সংসার চলবে না ?”—

“তবু শক্তি থাকতে পুরুষ-মানুষ চাকুরী ছেড়ে এসে বাড়ী  
বসে থাকবে, এটা, শিশির, তুমিই কি ভাল বলে মনে”—

—“করছি !—যে হঃসহ পরিশ্রম করে দাদা সংসার রক্ষা  
করেছেন, তা’ আমি ভুলিনি’ ! তাঁকে বিশ্রাম দিতেই হবে,  
এবং সেটা যে এখন থেকেই, তা’ আমি পরিকার বলে  
দিচ্ছি,”—

## গৌরী

পানগুলি গুছাইয়া ডিবায় রাখিয়া গৌরী উঠিয়া দাঁড়াইল, কহিল, “তুই পরিষ্কার বলতে কেবল আমাকেই পারিস্ ! কেন, তুই এখনও সেই ছোটটিই থাকবি ?”

গৌরীর হৃদয়ে একটি অনাবিল আনন্দ ও তৃপ্তিব উচ্ছ্বাস মুখের হইয়া উঠিতেছিল। এই দিগ্বিজয়ী যুবকটি যে এখনও কাছে আসিয়া, অবোধ সরল শিশুটির মতই যখন তখন আব্দার পরিপূর্ণের অন্ত তাহার উপরই দাবী করে, অত্যাচাব কবে, ইহা মনে করিয়া এই নির্ভবপটু মেহ-পাত্রটির প্রতি তাহার মেহ আরও নিবিড় হইয়া উঠিতেছিল।

—“আমি বাপু, কিন্তু বলতে পারিব না,”—গৌরী ড়্যাবেব দিকে ফিরিয়া দাঁড়াইল। তাহার তান্মূল-রাগ-বঞ্জিত অধরে একটু মৃদু হাসি ক্রীড়া করিতেছিল।

শিশির দৃঢ়কণ্ঠে কহিল, “তা তোমাকে বলতেই হবে বোদি’, নইলে”—

গৌরী ফিরিয়া দাঁড়াইয়া কহিল—“নইলে তুমি কি করতে চাও, শিশির ?”—

—“কি করতে চাই ?—একটু এগিয়ে এসে দেখ,”—গৌরী অগ্রসর হইয়া আসিল ; শিশির চেয়ারেব উপর বসিয়া পড়িয়া, কাগজ, কালী, কলম টানিয়া লইল, এবং দ্রুত নিপুণহস্তে

## গৌরী

ইংরাজিতে যাহা লিখিয়া গেল, তাহা গৌরী দাঁড়াইয়া পড়িতে-  
ছিল। গৌরী কিছু ইংরাজী জানিত এবং চিঠিপত্রগুলি পড়িয়া  
সাধারণ-ভাবে বুঝিতে পারিত।

গৌরী চিঠি পড়িয়া কহিল, “তুমি কি ফ্রেপ্লে, শিশির?”

শিশির সত্যই যে পদত্যাগ-পত্র লিখিয়া শেষ করিবে,  
গৌরী তাহা একবারও মনে করিতে পারে নাই।

“তবে এ চিঠি আজ্-কাল ডাকেই রওনা করে দেব?”—  
ক্রমুগল কুঞ্চিত কবিয়া শিশির কহিল।

—“তাও কি হয়? আচ্ছা কি বলতে হবে বল, আমি সব  
ত আর গুছিয়ে বলতে পারিব না।”—

—“তুমি যা’ ভাল মনে কব বলো, আমার যা’ বলার তা’  
সবই তোমাকে বলেছি।”—

গৌরী একটু হাসিয়া কহিল, “আচ্ছা বল্—বল্!”—

আল্‌নাব উপর হইতে সার্টটা টানিয়া লইতে লইতে শিশির  
কহিল, “বোদি’, কয়েকটা পয়সা এনে দাও, টিকিটের জন্ত।”—

গৌরী কক্ষান্তরে চলিয়া যাইতেছিল, শিশির ডাকিয়া  
কহিল, “ভাল কথা বোদি’, দক্ষিণপাড়ার ছেলেগুলি ভারি  
ধবেছে, তাদের লাইব্রেরীর জন্ত কিছু চায়। তুমি যদি বল ত  
কিছু তা’দেব দি!—কি বল, বোদি?”—

## গৌরী

গৌরী দুয়ারের কাছে কিরিয়া দাঁড়াইয়া হাসিয়া কহিল,  
“তা’ তোমার যা ইচ্ছা হয় দাও, আমি আর কি বলব ?”—

“বাঃ, আমি যে তাদের বলেছি, বোদি’ যা’ বলেন, দেব !”

“তবে পাঁচ টাকা দিলে হবে ?”

“অত ! তা’ বেশ, তুমি যা’ বলেছ, তাই দাও ; ছেলে-  
গুলির কপাল ভাল !”

গৌরী টাকা ও কয়েকটি পয়সা আনিয়া শিশিরের হাতে  
দিতে দিতে কহিল,—

“কিছু টাকা তোর কাছে রেখে দিলেই ত পারিস,  
শিশির ! টিকিটের পয়সাটাও আমার কাছ থেকে চেয়ে  
নিবি ! কেন আর এমনি নাবালক থাকবি তুই ?” গৌরীর  
মুখে হাসি দেখা যাইতেছিল, কিন্তু চোখের পাতা জলে  
ভিজিয়া উঠিয়াছিল। তরল হাস্তজড়িত-কণ্ঠে শিশির কহিল,  
“আমি চিরকালই যেন তোমার কাছে নাবালক থাকতে পারি,  
বোদি’ !”

শিশির বাহির হইয়া গেল ! গৌরী প্রদীপ গুছাইয়া  
রাখিয়া, গৃহ-দেবতার বৈকালিক ভোগ সাজাইতে বসিল !

শিশির কৰ্ম গ্রহণ করার পর হইতেই এক নূতন ‘বাহানা’ ধরিয়াছিল।

কৰ্মজীবনের আরম্ভ হইতে আজ পর্য্যন্ত শচীন একটি দিনের জন্তও অবসর পায় নাই; দারুণ শ্রমে তাহার শরীর ভাঙিয়া পড়িতেছিল, তবু বিরাম নাই, বিশ্রাম নাই, সে খাটিয়াই যাইতেছে! কোনও আরাম, সুখ, বিশ্রাম সে চাহে নাই। গোঁরীর সঙ্গ হইতেও সে নিজেকে এতাবৎকাল পর্য্যন্ত একরূপ বিচ্ছিন্নই রাখিয়াছে! এমন অবকাশ কোনও দিনই মিলে নাই যে, কিছু দীর্ঘকালের জন্ত পল্লীজীবনের মধ্যে ফিরিয়া আসিয়া একটা স্বস্তির নিশ্বাস ফেলিবে!

পঠদশায় শিশির একবার প্রাণপণ চেষ্টা করিয়া দেখিয়াছিল, কলিকাতার একটি ক্ষুদ্র বাসায় গোঁরীকে প্রতিষ্ঠিত করিয়া, একটি ক্ষুদ্র সংসার রচনা করিয়া তুলিতে পারে কি না, শচীনকে একটু শাস্তি ও আরামের মধ্যে রাখিতে পারে কি না!

## গৌরী

কিন্তু শচীনকে জন্তাই সে তাহাতে কৃতকার্য হয় নাই। পল্লীর বাড়ীটি ছাড়িয়া কোনও দিনই যে গৌরীর বিদেশে যাওয়া হইবে না, তাহা শিশির নিশ্চিতরূপেই বুঝিতে পারিয়াছিল; এবং সেই পঠদশাতেই সে আপনার সমগ্র শক্তিকে বিশ্ববিদ্যালয়ের পরীক্ষাগুলির মধ্য দিয়া সসম্মানে উত্তীর্ণ হইয়া যাইবার জন্ত নিয়োগ করিয়া রাখিয়াছিল।

আজ সকল সাধনাস্ত্রে বীণাপাণির বরপুত্রের দিকে পদ্মালয়াও যখন একবার অপাক-দৃষ্টিতে চাহিলেন, তখন শিশিরের দৃঢ়প্রতিজ্ঞাই হইল যে, সে শচীনকে কলিকাতার কৰ্ম-কোলাহলের মধ্য হইতে বিযুক্ত করিয়া লইয়া পল্লীর শান্তজীবনের মধ্যে প্রতিষ্ঠিত করিবেই!

শিশির যখন কোনও মতেই শচীনকে কৰ্মত্যাগ করাইতে পারিল না, তখন সে গৌরীর কাছে দৃঢ়কণ্ঠে ঘোষণা করিয়া বসিল, যে, গ্রীষ্মের ছুটির অগ্রে সে আর স্বীয় কৰ্মস্থলে ফিরিয়া যাইবে না এবং বাড়ীতেই বৌদিদির অঞ্চলের ছায়ায় মহা আনন্দে দিনগুলি কাটাইয়া দিবে!

গৌরী তাহাকে অনেক বুঝাইল, ফল হইল না!

শচীন তাহার অনিচ্ছা ও অমত দুই-ই গৌরীর কাছে

## গৌরী

লিখিয়া জানাইল ; কিন্তু দৃঢ়প্রতিজ্ঞ শিশিরকে কোনও মতেই নিরস্ত করা গেল না !

শিশির এখন আর ছোটটি নহে, সাংসারিক বিষয়ে তাহার মতামতকে এতটা উপেক্ষা এখন আর শচীন করিতে পারে না, যাহাতে শিশিরের অন্তরে কোনও প্রকারে আঘাত লাগিতে পারে ! সুতরাং দীর্ঘকালের বিতর্কের পর শচীনকেই পরাজয় স্বীকার করিতে হইল ।

শচীন একেবারেই কৰ্ম্মত্যাগ না করিয়া ছয়মাসের অবকাশ গ্রহণ করিয়া বাড়ী আসিল । উদ্দেশ্য, সাক্ষাৎ-সম্বন্ধে শিশিরকে একবার বলিয়া দেখিবে ।

সেদিন দুপুরের আহারের সময় শচীন কহিল, “শিশির, আমাকে যে একেবারেই অকৰ্ম্মণ্য ক’রে রাখতে চাস, এটা কি ভাল হবে ? এ ছ’টা মাস কেটে গেলে, তোর জেদ্ যদি তুই ছাড়িস, তা’ হ’লে না হয়—”

শিশির কথাটা শুনিয়া, জলের গেলাসের মধ্যে হাত ধুইতে ধুইতে নিম্নস্বরে কহিল,—“বাড়ীটাকে একেবারে ছেড়ে দিলে ত চলবে না, দাদা ! এতকাল বোদি’ এ বাড়ীর জন্ত প্রাণপণ করেছেন, এখন তাঁকে একটু আরামে রাখতেই হবে,—”

গৌরী একটা তরকারী লইয়া আসিয়াছিল, সে ব্যস্তভাবে

## গৌরী

কহিল, “ও কি শিশির, হাত ধুচ্ছ যে !—আর একটা মাছের তরকারী রয়েছে, দুধ আছে,”

“তাই নাকি ! লক্ষ্য করিনি !”—অশ্রুমনস্ক শিশির হাসিয়া উঠিল। গেলাসটা সরাইয়া বাধিয়া গৌরীর মুখের দিকে চাহিয়া কহিল, “ও আবার কি এনেছ তুমি ? আমার যে খাওয়া হয়ে গেছে !”

“তা’ তো বটেই, এগুলি সব তবে পাড়ার লোক ডেকে খাওয়াই !”—গৌরী শিশিরের পাতের কাছে তরকারীর বাটিটা রাখিয়া দিয়া মূহু হাসিল।

“কি তোমাদের কথা মীমাংসা হ’ল ? কি স্থির কম্বলে ?” গৌরী কহিল।

—“তোমার বৃষ্টি কাজ নেই, বৌদি’ ! আমার যা’ বলবার তা’ তোমাকে একদিনই বলে বেধেছি। একজন বাড়ীতে থাকবেই, হব দাদা, না হয় আমি, এখন কা’কে তুমি বাড়ী থাকতে বল ?” গৌরীর দিকেই চাহিয়া শিশির এমন ভাবেই কথাগুলি এক নিশ্বাসে বলিয়া ফেলিল, যেন শচীন সেখানে উপস্থিতই নাই।

শচীন একবার গৌরীর মুখের দিকে চাহিয়া, একটু হাসিয়া ধীরে ধীরে কহিল,—



## গৌরী

“তা উনি হয় ত তোমার দাদাকেই থাকতে বলবেন।”

গৌরী তীব্র অপান্ন-দৃষ্টিতে স্বামীর মুখের দিকে চাহিয়া অস্পষ্ট স্বরে কহিল, “ওমা, কথার শ্রী দেখ !”

গৌরী ভারি লজ্জা পাইল ; এবং মাথার কাপড়টা একটু টানিয়া দিয়া পাক-ঘরের দিকে চলিয়া গেল !

শচীন দেখিল, শিশিরের সঙ্গে আর তর্ক করা বৃথা ।  
খাওয়া শেষ করিয়া উঠিতে উঠিতে কহিল, “তোমার ছুটি আর  
ক’দিন আছে, শিশির ?”

—“আমছে সোমবার খুলবে, আর পাঁচ দিন ।”

বি, এ, পবীক্ষায় পাশ করার কিছুদিন পরেই শিশিরের বিবাহ হইয়া গিয়াছিল।

নববধূ লক্ষ্মী ধনবানের আদরিণী কন্যা ; বিবাহের পর হইতে এ পর্য্যন্ত এ বাটতে মাত্র দুইবার আসিয়াছে। গোবী আনিতে পাঠাইলেই একটা না একটা আপত্তি তুলিয়া লক্ষ্মীব মাতা লক্ষ্মীকে পাঠাইতেন না। গোরী ভাবিত, লক্ষ্মী এখনও ছেলে-মানুষ,—একটু বড় হইয়া উঠিলেই নিজেব সংসারের উপর মায়া বসিবে এবং তখন নিজেই উদ্যোগ করিয়া চলিয়া আসিবে। কিন্তু গত বৎসর চলিয়া যাওয়াব পরও এ পর্য্যন্ত গোবী লক্ষ্মীকে আনিবার জন্ত তিনবার লোক পাঠাইয়া যখন আনিতে পাবে নাই, তখন সে সত্যি একটু মুন্সিলে পড়িল।

শিশির যখন গ্রীষ্মাবকাশে বাড়ী আসিল, তখনও গোবী লক্ষ্মীকে আনিতে পাঠাইল। কিন্তু লক্ষ্মী আসিল না। গোবী বিশেষ করিয়া অমুরোধ জানাইয়া পত্র দিয়াছিল ; তাহাতেও কোনও ফল হইল না। তখন গোরী একেবারেই হতাশ হইয়া

## গোরী

পড়িল। এই ব্যাপারটার জন্ত সে শিশিরের কাছে নিতান্তই কুণ্ঠিতা হইয়া পড়িয়াছিল। একদিন সে সাহসে ভর করিয়া শিশিরকে লক্ষ্মীর পিত্রালয়ে যাইবার জন্ত অনুরোধও করিয়াছিল।

শিশির তখন মধ্যাহ্নের আহারের পর শুইয়া পড়িয়া একথানা ইংরাজী নভেলের পৃষ্ঠায় মনঃসংযোগ করিবার চেষ্টা করিতেছিল।

গোরী যখন ভয়ে ভয়ে শিশিরের কাছে দাঁড়াইয়া কথাটা উত্থাপন করিল, তখন শিশির কোনও উত্তর দিল না, শুধু মুখের উপর হইতে বহিখানি নামাইয়া একবার গোরীর মুখের দিকে চাহিল ; তাহার দৃষ্টিতে একটা বিরক্তির সুস্পষ্ট আভাস জাগিয়া উঠিয়াছিল। কোনও কথা না কহিয়া শিশির পরক্ষণেই বহি তুলিয়া লইল। গোরী মুহূৰ্ত্তে কহিল,—“লক্ষ্মী তাইটি আনার!”—

শিশির বহি ফেলিয়া দিয়া উঠিয়া বসিল। তীব্র-কণ্ঠে কহিল, “তুমি আস্তে লিখেছ, সেইটেই যথেষ্ট নয় কি বোদি?”—

গোরী আজ বিদ্রোহকে উপেক্ষা করিবার জন্ত প্রস্তুত হইয়াই আসিয়াছিল ; ধীরে ধীরে কহিল, “আমি একবার

## গৌরী

লিখেছি কি না লিখেছি, তা' তোমার ত দেখ্‌বার দবকার নেই ভাই; আমি তোমাকে অনুরোধ করছি, তুমি, লক্ষী ভাই আমাব, একবারটি'—”

—“সে হবে না, বৌদি'! যারা তোমার চিঠিকে উপেক্ষা করতে পেরেছে, তাদের বাড়ীতে বাওয়া আমাব কর্ত্ত্ব নহ'—

—“উপেক্ষা করবে কেন? অন্ত্রবিধা ছিল, পাঠায়নি; সব সময়েই যে সকলেব অন্ত্রবিধা থাকতে হবে, এমন কথা নেই ত!—

তীব্রস্বরে কহিল, “বৌদি’—

গৌরী শিশিরের মুখেব দিকে চকিত-দৃষ্টিতে চাহিল।

শিশির দ্রুত অস্থির-কণ্ঠে বলিয়া উঠিল, “এই এক বছরেব মধ্যে তুমি ক'বার আনুতে লোক পাঠিয়েছ, তা' কি আমি জানি না, বৌদি'?”

—“কই, ক'বার আমি লোক পাঠিয়েছি? কে তোমাকে বলে এ সব কথা?”—নিমজ্জমান ব্যক্তি যেমন একটা সামান্য আশ্রয়কেও আঁকড়িয়া ধরিবার জন্য একবার শেষ চেষ্টা করিয়া দেখে, গৌরীও তেমনি একবার শেষ চেষ্টা করিয়া দেখিবাব জন্য কথাটা বলিল। কিন্তু ঠিক সেই মুহূর্ত্তে তাহার মুখখানি বে

## গৌরী

কতখানি স্নান হইয়া গিয়াছে এবং চক্ষুব দৃষ্টি যে কতটা উৎসাহীন হইয়া পড়িয়াছে, তাহা গোবী নিজেও যেন কতকটা উপলব্ধি করিতে পারিতেছিল ! শিশিব তেমনি অস্থিভাবে কহিল, “কাউকে বলতে হবে কেন, বৌদি’ ? আমি নিজেই সব গোঁজ বাখি ।”—

গোবীৰ আৰ কোনও উত্তৰ ছিল না । তবু সে হতাশভাবে কহিল, “কেন, সংসারের এমন সব তুচ্ছ ব্যাপারেরও গোঁজ তুমি অত ক’বে বাখতে যাও কেন ?”

“সংসারের কিছুবই আমি গোঁজ বাখতে চাইনে, কিন্তু যে ব্যাপারগুলিতে তোমাকে আঘাত করে এবং উপেক্ষা জানায়, তা’ তুমি তুচ্ছ মনে করতে পার, বৌদি’, কিন্তু আমি সেই গুলিকেই সব চেয়ে গুরু বলে মনে করি”—

গোবী উচ্চকণ্ঠে কহিল, “এ তোমার বড় বাড়াবাড়ি !— তিলকে তাল ক’বে তোলাটা ত ঠিক নয় ।—দূর থেকে কে কার অসুবিধা ঠিক বুঝতে পারে ? তুমি নিজে একবার গেলেই সব গোল কেটে যাবে, —সব না জেনে শুনেই কার উপর অবিচার কবাটা ত ঠিক নয়,—”

গোবীৰ কথা শেষ হইবার পূর্বেই শিশিব কহিল, “তোমার বিচার নিয়ে তুমিই থাক, —ইচ্ছা হয়, আবার চিঠি

## গৌরী

লেখ, লোক পাঠাও,—আমি যেতে পারব না, ঠিক জেনে রাখ ।”

আলনার উপর হইতে একটা জামা টানিয়া লইতে লইতে শিশির কহিল,—“কে তোমাব সঙ্গে বসে বসে ঝগড়া করবে বাপু, তোমার বা’ খুসি কর, আমি বেরিয়ে পড়্‌লুম ।”—

পূজার ছুটিতে শিশির বাড়ী আসিয়াছে ।

চতুর্থীর দিন সকাল বেলা শিশির নিজের ঘরটা গুছাইতে-ছিল । গৌরী আসিয়া কহিল,—“ও-ঘরে দুটো টেবিল রয়েছে, তুমি একটা এ-ঘরে এনে রাখ ; কাগজপত্র বইটাই গুলি রাখতে সুবিধা হবে ।”

চাকরটা বাহিরে বাইতেছিল, গৌরী তাহাকে টেবিল আনিয়া দিতে বলিয়া কার্যাসম্বরে চলিয়া গেল । চাকর টেবিল আনিয়া দিল । ড্রয়ারের ভিতর কিছু কাগজ ও কয়েকখানা চিঠিপত্র ছিল ; শিশির সে গুলিকে বাহির করিয়া আনিল । কোন আবশ্যকীয় কাগজ আছে কি না একবার নাড়িয়া দেখিল । কাগজগুলি একটা চুবড়ির মধ্যে ফেলিয়া দিবার সময়ে একখানা চিঠির উপর শিশিরের দৃষ্টি পড়িল । চিঠির উপর শচীন্দ্র নাম লিখিত ছিল । ডাকঘরের মোহরটা পরীক্ষা করিয়া দেখিল, সে যাহা সন্দেহ করিয়াছে, তাহাই বটে । চিঠি লক্ষ্মীর পিত্রালয় হইতে আসিয়াছে ।

## গৌরী

খামখানা হাতে করিয়া শিশির একটু ভাবিল, তার পর খামের ভিতর হইতে চিঠি বাহির করিয়া পড়িল।

চিঠি পড়িতে পড়িতে শিশিরের দুইহাত মুষ্টিবদ্ধ হইয়া আসিল, ললাটেরেখা গভীর হইল, অধর দংশন করিতে করিতে শিশির তীব্রবেগে উঠিয়া দাঁড়াইল।

গৌরী পাকগৃহের মধ্যে কি করিতেছিল, শিশির চঞ্চলপদে দুয়ারের কাছে যাইয়া দাঁড়াইল, ভিতরের দিকে একবার চাহিয়া কহিল, “বোদি, আমি মীরপুর যাব,—এখন,—”

শিশিরের তীব্র কণ্ঠস্বর শুনিয়া গৌরী ফিরিয়া চাহিল; শিশিরের রুদ্রমূর্ত্তি দেখিয়া চকিতভাবে কহিল, “কি হবেছে শিশির,—মুখ চোখ অমন দেখাচ্ছে কেন তোমার ?”—

“কিছু হয়নি, আমি মীরপুর যাব, তাই বলতে এসেছি। আমি আজই যাব,—এখন যাব !”

“এখন যাবে !—পাক হয়নি, না খেয়ে কেমন করে যাবে ?—এখন হঠাৎ এমন ব্যস্ত হয়ে উঠলে কেন শিশির ?—”

“খাওয়া আমার হবে না, আমি ন’টার গাড়ীই ধরব,—তুমি দাদাকে ব’লো, তাঁর ফিরবার দেরী আছে। তুমি কিছু টাকা আমায় দাও”—

গৌরীর চিত্ত একটা অনির্দিষ্ট আশঙ্কায় পীড়িত হইতেছিল,



## গৌরী

সে শিশিরের কাছে সরিয়া আসিয়া স্নেহ-তরলকণ্ঠে কহিল, “কি হয়েছে শিশির?—তোমার মুখ দেখে ত আমার ভাল বোধ হচ্ছে না,—কাকু অসুখ বিস্মৃত ত করেনি?”

“হবে কি?—কিছু হয়নি! পূজাব দিনে ঘরের বোটাকে কি একবার আনতে বলতেও নেই,—তোমরা ত বলবে না, কাজেই আমার নিজেবই যেতে হবে।”

শিশিবেব কথা শুনিয়া গোবী বুঝিল, কিছু একটা গুরুতর ব্যাপার ঘটিয়াছে, যাহাতে হঠাৎ তীব্র আঘাত পাইয়াই শিশির অত্যন্ত উত্তেজিত হইয়া উঠিয়াছে; এবং সেই আঘাতটা যে শিশিব লক্ষ্মীর পিত্রানঘেব দিক হইতেই পাইয়াছে, তাহাও গোবীব বুঝিতে বাকী বহিল না। শিশিবেব হাতখানা নিজের হাতের মধ্যে টানিয়া লইতে লইতে উদ্বেগপূর্ণকণ্ঠে গোবী কহিল, “আমার মাথা থাম্ শিশির কি হয়েছে বল।”—

গোবীব স্নেহতপ্ত প্রকোষ্ঠ মধ্যে শিশিবেব বলিষ্ঠ হাতখানি একটি ক্ষুদ্র শিশুব হাতখানির মতই কাঁপিতেছিল। সেই স্নেহস্পর্শ শিশিবকে অভিভূত করিয়া দিতেছিল, তাহার বিশাল চক্ষু দুইটা অশ্রুতে ভরিয়া উঠিল;—সে হাত ছাড়াইয়া নিতে নিতে আর্দ্রকম্পিত কণ্ঠে কহিল,—“কেন তোমরা এই একঘর কুটুম্বের কাছে এমন করে বার বার অপমান ভোগ করছ?”

## গৌরী

আমার কাছেও সে অপমান গোপন কর কেন? আমি কি এতই দূরে সরে গিয়েছি? এই অপমান লুকিয়ে লুকিয়ে সহ্য করে, কেন তোমরা আমাকে এমন কুণ্ঠিত করে তুলছ, বোদি'?"

গৌরী বিস্মিত কণ্ঠে কহিল, "কোথায় আমরা অপমান ভোগ করে তোর কাছেও লুকিয়ে রেখেছি, শিশির? তুই কি যে বলিস তা'ত"—

—"মোটাই বুঝতে পারছ না, কেমন, এই ত?"—হঠাৎ শিশির উগ্র হইয়া উঠিয়া, গোবীর হাতের মধ্য হইতে হাত টানিয়া লইয়া কহিল, "তা' বেশ, না বুঝে থাক, না বুঝেছ,— তুমি টাকা এনে দাও!"—

গৌরী শিশিরের প্রকৃতি ভাল কবিয়াই জানিত। সে যখন যাওয়াই সঙ্কল্প করিয়াছে, তখন তাহাকে আর বাধা দিয়া যে কোনও লাভই নাই, তাহা সে বেশ জানিত। আর কোনও কথা না বলিয়া গৌরী কিছু টাকা আনিয়া দিল, শিশির টাকা নিয়া নিজের ঘরে চলিয়া গেল।

মুহূর্ত্ত পরে গৌরী একটা রেকাবীতে কিছু খাবার ও এক গেলাস জল নিয়া শিশিরের ঘরে গিয়া দেখিল, শিশির চেয়ারের উপর বসিয়া পড়িয়া, সম্মুখের টেবিলটার উপরেই মাথাটি অবসন্ন ভাবে নীচু করিয়া রাখিয়া চক্ষু মুদ্রিত করিয়া রহিয়াছে।

## গৌরী

গৌরীর পায়ের শব্দ পাইয়া শিশির মাথা তুলিয়া চাহিল। ব্যথিত দৃষ্টিতে গৌরী চাহিয়া দেখিল, তখনও শিশিরের চক্ষের অশ্রুবিন্দু শুকায় নাই !

কোনও কথা না কহিয়া খাবারের রেকাবীখানা হাতে করিয়া গৌরী টেবিলের পার্শ্বে দাঁড়াইয়া রহিল।

শিশির ঠঠাৎ উঠিয়া দাঁড়াইয়া কহিল, “আমি বে কি হয়ে যাচ্ছি, তা’ আমি নিজেই ভাল ক’রে বুঝতে পাচ্ছিনা,—তোমাকে ব্যথা দিয়ে আমি কোথায় যাব, বোদি’ ?—আমি যাব না !”—

গৌরীও স্নেহপূর্ণ অস্বস্তি শিশিরের জন্য আশঙ্কায় উন্মুখ হইয়া উঠিতেছিল।

শিশির যে বিবাহিত জীবনে সুখী হইতে পারে নাই, সে জন্য গৌরীর বুকের মধ্যে একটা তীব্র কুষ্ঠাপূর্ণ বেদনা নিশিদিন নিবিড় হইয়াই ছিল !

বিবাহের পূর্বে শিশির একদিন বলিয়াছিল, ‘বড় লোকের ঘরের মেয়ে না এনে, বড় গৃহস্থ ঘবেব মেয়ে আন, যে তোমার মর্যাদা বুঝবে, বোদি’ !—কথাটা গৌরী একটি দিনের জন্যও ভুলিতে পারে নাই।

ধনীর জামাতা হইলে শিশির আদর যত্ন পাইবে, তাহাই মনে করিয়া, যখন মীরপুরের জমীদারের একমাত্র দুহিতার

## গৌরী

সহিত বিবাহ প্রস্তাব হইল, তখন গৌরী কত আগ্রহেই সম্মত হইয়াছিল ! বৌদিদির আগ্রহ দেখিয়া শিশির আর কোনও কথাই বলে নাই !

গৌরীর কেবলি মনে হইত শিশিবের এই অশান্তি ও অসুখেব সে-ই একমাত্র কারণ ! সমস্ত অপবাধেব বোঝাটা নিজের উপর চাপাইয়া দিয়াও সে যখন কোনও মতেই শান্তি পাইত না, তখনই সে মীরপুরে পত্র লিখিতে বসিত ; লোকেব পর লোক পাঠাইত ! কিন্তু মীরপুরেব জনীদারগৃহিণী নানা-প্রকার আপত্তি বৃষ্টিই কবিয়া তুলিতেন, লক্ষ্মীকে কবে যে সঠিক পাঠাইতে পারিবেন, তাহা কোনও দিনই নির্দিষ্ট কবিয়া বলিয়া দিতেন না ।

গৌরী চিঠিতে যখন কোনও কাজই হইল না, তখন শচীন লক্ষ্মীৰ পিতার নিকট পত্র লিখিল । শচীন আশা করিয়াছিল, লক্ষ্মীর পিতা সত্যশঙ্কর চৌধুরী যাহা হয় একটা সম্মত ব্যবস্থাই করিবেন ! কিন্তু সত্যশঙ্কর বাবু শচীনেব চিঠিব উত্তরে এমন একখানি চিঠি লিখিলেন, যে চিঠি শচীন ত সাহস করিয়া শিশিরকে দেখাইতে পারিলই না, পরন্তু সে যে কি করিবে তাহাও স্থির করিতে না পারিয়া উদ্ভ্রম হইয়া উঠিল ।

আজ ড্রয়ারের কাগজপত্রের মধ্যে শিশির হঠাৎ সেই

## গৌরী

চিঠিখানি পাইয়া বসিল। চিঠিখানির মধ্যে এমন কয়েকটি কথা ছিল, যাহা লিখিয়া সত্যশঙ্কর বাবু অমার্জনীয় অপরাধ করিয়াছেন বলিয়াই শিশিরের মনে হইতেছিল। কিন্তু দাদাকে এবং বৌদিদিকে কি প্রকারে পুনঃ পুনঃ এইরূপ অপমান হইতে রক্ষা করিবে, তাহাই আজ শিশিরের কাছে সৰ্ব্বাপেক্ষা চিন্তার বিষয় হইয়া পড়িয়াছিল।

গৌরী খাবারের রেকাবীখানা শিশিরের সম্মুখে রাখিয়া মৃদুস্ববে কহিল, “শিশির কিছু খেবে নে।” তারপর একটু চুপ করিয়া থাকিয়া দীর্ঘে দীর্ঘে কহিল, “আমি সব কথা বুঝতে পেরেছি, তুই বোধ হয় সেই চিঠিটাই পেয়েছিস্, ঐ ড্রয়ারের মধ্যেই আমি তা’ রেখেছিলাম। আমি এতদিন তোকে মীরপুর যেতে বলেছি, তুই যাসনি,—আজ তোকে আমি কিছুতেই যেতে দিতাম না ; কিন্তু আমি নিশ্চিত বুঝতে পেরেছি, আর উপেক্ষা করা ঠিক হচ্ছেনা। শিশির আজ আমি তোকে সত্যিই মীরপুর যেতে দেব, যদি তুই একটা কথা আমার কাছে স্বীকার করে যেতে পারিস্!”—

শিশির খাবার খাইতে খাইতে মুখ তুলিয়া গৌরীর মুখের দিকে চাহিয়া কহিল,—“কি” ?

—“তুই আমাকে বল, যে, তারা যে রকম ব্যবহারই করুক

## গোবী

না কেন, তুই তা'তে কোনও উত্তরই করবিনে,—এবং সেখানে কোন অনর্থ ঘটাবিনে ; শুধু সহ্য কবেই চলে আসবি !”—

গোবী তাহার স্নেহ-বাকুল দৃষ্টি শিশিবেব মুখের উপর স্থাপন কবিয়া অস্থিভাবে উত্তবেব জন্ত অপেক্ষা কবিতো লাগিল !

শিশির কহিল, আমি কোনদিনই মীবপূর যেতাম না, বোদি' ! কিন্তু বাবা আমাব দাদাকেও অপমান কৰ্ত্তে সাহস কবে, তাৰেব আমি কোনও মতে ক্ষমা কৰতে পাৰিনা ! অশ্বেব সংসাবেব ব্যবস্থাৰ উপৰ অনাছতভাবে কৰ্ত্তব্য কৰ্ত্তে আসা যে একটা অমার্জনীৰ অপবাধ, সে জ্ঞানটাও যদি তাৰেব না থাকে, তা' হ'লে,”—

গোবী বাধা দিয়া কহিল,—“না, তুমি যদি সেখানে গিয়ে অনর্থই ঘটাব, বিবাদেব সৃচনাট কৰ, তা' হ'লে যেযে কাজ নাই তোমার,”—

—“না, বোদি, আমাকে এবার যেতেই হবে ; সকল অপমান ও অনর্থকে সৃষ্টি কবে তোলবাব জন্ত যে সেখানে বয়েছে, সে কোনও দিনই এ বাড়ীতে আসবাব ইচ্ছা বাঞ্চে কি না, শুধু সেইটুকুই আমি জেনে আসতে চাই !—তবে তোমার কথাই থাকবে, আমি সবই সহ্য ক'বে আসব, তুমি যা' বলবে তাই ক'ব, এই বলছি !”

শিশির মীরপুর আসিয়াছে ।

পঞ্চমীর সন্ধ্যা ; শরতেব নির্মল আকাশে শশাঙ্কের হাসি ফুটিয়াছে । বিশ্ব-সৃষ্টিকে ওতপ্রোতভাবে আবেষ্টন করিয়া যেন একটি বিবর্ত 'ও' অদৃশ্যভাবে রহিয়াছে ; ক্ষীণ, বক্র শশাঙ্ক যেন তাহাবই চন্দ্রবিন্দুটী, লোকলোচনের কাছে প্রত্যক্ষ হইয়া উঠিয়াছে ।

দ্বিতলের ছোট একটি কক্ষ ; কক্ষটি সুসজ্জিত ; পূবের ও দক্ষিণের জানালাগুলি উন্মুক্ত রহিয়াছে । দক্ষিণের দিকে একটা খোলা বুলবাবন্দা ; বেলিংএর থামগুলির মাথায় মাথায় বিচিত্র চীনা মাটির টব রহিয়াছে ; টবে টবে ফুলগাছ, পাতাবাহারের গাছ ; ফুলগাছে ফুল ফুটিয়াছে ; একটা মৃদু পবনপ্রবাহ ফুলের গন্ধ গায়ে মাখিয়া কক্ষের মধ্যে প্রবেশ করিতেছিল ; গন্ধ বিলাইবার জন্ত, কক্ষমধ্যে কে আছে, যেন তাহাকেই খুঁজিতেছিল । কক্ষমধ্যে আর কেহ ছিল না, শুধু— শিশির একটা টেবিলের কাছে চুপ করিয়া বসিয়া রহিয়াছে !

## গৌরী

বাতাস তাহার উড়ানীখানি একটু উড়াইয়া, কুঞ্চিত লগাটদেশ একটু স্পর্শ করিয়া, কাণেব কাছেব চুলগুলি একটু নাড়িয়া দিয়া, বহিয়া গেল ।

শিশিবেব কোনও দিকেই লক্ষ্য ছিল না । তাহার লগাট একটু কুঞ্চিত, দৃষ্টি লক্ষ্যহীন ; হাত দুইখানি মুষ্টিবদ্ধ । সে যে কিছু ভাবিতেছে, তাহা তাহার মুখেব দিকে চাহিলেই বুঝা যায় ।

এমন সময়ে, উত্তরের দিক্‌কাব দুয়ার খুলিয়া কেহ সন্তর্পণে কক্ষমধ্যে প্রবেশ করিল । যে আসিল, সে লক্ষ্মী । লক্ষ্মী কক্ষেব মধ্যে প্রবেশ করিয়াই দুয়ার বন্ধ করিয়া দিল, এবং ধীবে ধীরে টেবিলের পাশে আসিয়া দাঁড়াইল ।

দক্ষিণেব খোলা জানালার পথে হঠাৎ একটা দম্‌কা বাতাস প্রবেশ করিয়া টেবিলেব উপবকার স্নিগ্ধ আলোটাকে মুহূর্ত্তেব জ্বল উজ্জ্বল করিয়া তুলিল, এবং লক্ষ্মী'ব মাথা'ব অনভ্যন্ত গুণ্ঠনটাকে একটু সরাইয়া দিয়া গেল ।

শিশিব তীব্রদৃষ্টিতে লক্ষ্মীর মুখেব দিকে একবার চাহিল, ঠিক তখনই একটু মৃদু হাসিয়া লক্ষ্মী কহিল, “তবু বে একবারটি এলে !”

শিশির দেখিল, লক্ষ্মীর উজ্জ্বল রূপ উজ্জ্বলতর হইয়াছে । দুই বৎসব শিশির লক্ষ্মীকে দেখে নাই ! সুদীর্ঘ দুইটি বৎসব,



## গৌরী

বিশ্বকর্মার মতই নিপুণহস্তে একটি বালিকার লীলাচঞ্চল দেহলতার উপর দিয়া তরুণীর সকল সৌন্দর্য্যসম্পদ পুষ্পিত করিয়া তুলিয়াছে !

শিশির দেখিল, লক্ষ্মীর কালো চক্ষের দৃষ্টি আরও নিবিড় হইয়াছে ; ঈষৎ বক্র রসপুট অধরপুট সোহাগের অপেক্ষায়ই যেন উত্তত হইয়া রহিয়াছে ! কপোলেব বর্ণস্বষমার অন্তরালে দ্রুত, উচ্ছ্বসিত শোণিত সঞ্চার বেন ধরা পড়িতেছিল ! কুঞ্চিত কুস্তলগুচ্ছ কৃষ্ণসর্পশিশুর মতই মুখখানির পাশে পাশে লতাইয়া নামিয়া ঈষৎ দুলিতেছিল । পৃষ্ঠদেশ ছাপাইয়া, অংসে, উরসে, গুচ্ছেব পর গুচ্ছ কুস্তল অযত্নবিশ্রুত হইয়া শোভা পাইতেছিল । কালো চুলের মধ্যদিয়া, নীলাম্বরীর আড়াল দিয়া, কর্ণের সুবর্ণভূষণ মৃদু আলোকসম্পাতে জ্বলিতেছিল, মন্দানিল সংস্পর্শে রহিয়া রহিয়া দুলিতেছিল !

শিশিবকে নীবব থাকিতে দেখিয়া মৃদুস্বরে লক্ষ্মী কহিল,  
“কি ভাবছ ?”

শিশির একটু চকিতভাবে আবার লক্ষ্মীর মুখের দিকে চাহিল, অন্তমনস্কভাবে কহিল, “ভাবছি, সত্যি তুমি কতটাই বদলে গেছ ।”

লক্ষ্মী গর্জ্বিতা, লক্ষ্মী মুখরা, তবু তাহার যেন একটু লজ্জা

## গৌরী

করিতেছিল। সে একবার তাহার দৃষ্টি নত করিয়া লইল, তারপর একবার চকিতে স্বামীর মুখের দিকে চাহিল। শিশির তেমনই অন্তমনস্ক, টেবিলের উপরের আলোটার দিকেই এক দৃষ্টিতে চাহিয়া রহিয়াছে।

লক্ষ্মী ধীরে ধীরে কহিল, “কই, আমি ত কিছুই বদলে যাইনি!”

—“যদি না বদলে যেতে, বোধ হয় ভাল হ’ত, লক্ষ্মী!”

লক্ষ্মী স্বামীর কথা ভাল করিয়া বুঝিল না, তবু কহিল, “না, আমি বদলাই নি!”

শিশির একবার একটু নড়িয়া চেয়ারের উপর ঠিক হইয়া বসিল, বিস্ফারিত দৃষ্টিতে লক্ষ্মীর মুখের দিকে চাহিয়া ডাকিল—  
“লক্ষ্মী,”—

লক্ষ্মী এমন একটা সুস্পষ্ট আহ্বানের জ্ঞান প্রস্তুত ছিল না, একটু চকিতভাবে স্বামীর মুখের দিকে চাহিয়া কহিল, “কি?”

লক্ষ্মী চাহিয়া দেখিল, শিশিরের দৃষ্টি তীব্র, সে যেন বিচারকের কঠোর পরীক্ষা-দৃষ্টি; লক্ষ্মী দুই পা পিছাইয়া গিয়া, আর একবার স্বামীর মুখের দিকে ভাল করিয়া চাহিল, তারপর ধীরে ধীরে কহিল, “কি বলবে?”

—“লক্ষ্মী, তোমাকে যেতেই হবে,—আজ, এখন যেতে

## গৌরী

হবে! দেখ্ছ, আমি এখন পর্য্যন্ত কাপড় জামাও ছাড়নি ; তোমার কাছ থেকে একটা শেষ কথা পেতে চাই,”—

“মা বাবার সঙ্গে কি কথা হ’ল?”

এতটা সহজ সুরে লক্ষ্মী উত্তর দিল, যে শিশির তাহা মোটেই পছন্দ করিতে পারিল না। ত্রকুণ্ঠিত করিয়া সে তীব্রকণ্ঠে কহিল,—“তা, তুমি না জান্বার কোনও কারণ আছে বলে মনে করি না ; তবু যখন জিজ্ঞাসা কর্ছ, শোন! কাল পূজা, তাঁরা তোমাকে আজ যেতে দেবেন না। আর আমাদের গ্রামের জল হাওয়া নাকি তোমার সম্বন্ধ হবে না। তাই যতদিন আমি তোমার থাকবার উপযুক্ত বন্দোবস্ত আমার কর্শ্বস্থলেই না কর্ছি, ততদিন তোমাকে এখানেই রাখতে চান্।—বোধহয় সেইটেই সব চেয়ে বড় কথা ; পূজার আপত্তিটা কিছু নয় বলেই মনে হ’ল!”—

লক্ষ্মীর মুখের হাসি অন্তর্হিত হইল, ধীরে ধীরে কহিল, “তা তুমি কি বল্লে?”—

“আমি নিয়ে যেতেই চেয়েছি, বেশী আর কি বল্বে, তাঁদের সেই একই কথা।”

“একবার ভাল করে বলে দেখ,”—

শিশির অস্থিরভাবে কহিল, “না। তা’ আর হয় না।

## গোরী

এখানে আমি এসেছি, তোমাকে নিয়ে যেতেই,—তুমি যাবে কি না আমি শুনতে চাচ্ছি।”—শিশিবেব কণ্ঠস্বৰ ক্ৰমেই উগ্র হইয়া উঠিতেছিল।

কুকণে শিশিৰ মীরপুর আসিয়াছিল, আৰু অশুভ মুহূৰ্ত্তে লক্ষ্মীৰ সঙ্গত তাহাৰ সাক্ষাৎ হইয়াছিল। বিশেষ চিন্তা না কৰিয়া লক্ষ্মী কহিল,—“মা বাবাব অমতে জোব কৰে যাওয়াটা——”

লক্ষ্মীৰ মুখেৰ কথা শেষ হওয়াৰ পূৰ্বেই অধীৰ শিশিৰ তীব্রকণ্ঠে বলিয়া উঠিল, “তা’ হলে চিবদিনই মা বাবাব কাছে থাকবাব সোভাগ্য তোমার হ’ক”—

চেয়ারটা সরাইয়া শিশিৰ তীব্রবেগে উঠিয়া দাড়াইল !

লক্ষ্মীৰ দুই চক্ষু মুহূৰ্ত্তেৰ অন্ত দীপ্ত হইয়া উঠিল, সে একবাৰ পূৰ্ণ দৃষ্টিতে স্বামীৰ মুখেৰ দিকে চাহিয়া কহিল, “আমাৰ সোভাগ্যেৰ কথা বলিনি”; একবাৰ ভাল কৰে মা বাবাকে বল্লে তাঁরা——”

—“না সে আমি আর পারব না; আমাব দাদাৰ ও বৌদিদিৰ চিঠিকে ধাৰা অপমান কৰতে পেরেছেন, আমি তাঁদের কাছে যে পর্যন্ত বলেছি, সেই যথেষ্ট, তার বেশী,”—

“তাব বেশী বল্লে ত অপমান কিছু নেই?”

## গৌরী

“অপমান ।—হাঁ, অপমান বই কি ! নিজেব আত্ম-সম্মান  
জ্ঞানকে অপমান কবাই হবে !”

লক্ষ্মী দক্ষিণ কবাস্তুলিগুলি মুক্ত করিয়া বাম পানিতলের  
শিথিল মুষ্টিমধ্যে চাপিয়া ধরিয়া মৃদুস্ববে কহিল,—“এমন ?”—

—“হাঁ, এমনি বটে !”

বিস্মিত, ক্রুদ্ধ, শিশিব ভাবিল, এই লক্ষ্মী ! এই নারীকে  
লইয়াই তাগাব সাবাজীবন অতিবাহন কবিতে হইবে । এই  
ধনীৰ ঢলানী, বিলাস-লালিতা নারী,—পল্লীর শান্ত বৈচিত্র্য-  
বিহীন গার্হস্থ্য-জীবনের মধ্যে কোথায় তাহাব আসন !

লক্ষ্মীর উজ্জ্বল রূপ, বিচিত্র ভূষা, কক্ষের স্নিগ্ধ আলোক-  
লেখা, পুষ্পগন্ধবাহী উদ্দাম-পবন প্রবাহ, শিশিবেৰ চতুর্দিকে  
যেন একটা তীব্র উপহাস ও উপেক্ষাব বচনা কবিয়া  
তুলিতেছিল ।

শিশিব দুই পা সবিয়া আসিতে আসিতে কহিল, “লক্ষ্মী,  
তুমি যখন তর্কেব স্ফুট কবে তুলেছ, তখন তুমি যে যাবে না,  
তা’ আমি বেশ বুঝ্তে পেরেছি ! সে কথাটা তোমাব মুখ  
দিয়েই শুন্তে আনাব সাধ নেই ; তোমাকে বল্তে না দিয়ে  
তোমাব ভবিষ্যতের যাওয়াব পথটা আমি খোলা রাখ্লাম ;  
কাৰণ আমি যদিই তোমাকে ক্ষমা কবতে না পারি, তোমাব

## গৌরী

বাপ মা ষাঁদের অপমান কবেছেন, তাঁরা তোমাকে, যে অবস্থায়ই তুমি যাও না কেন, বরণ করে ঘবে তুলে নেবেন,— আমি এখনি চল্লাম, আশা কবি তুমি তোমাব বাপ মাব দুলালী হয়ে স্নেহেই থাকবে !”

লক্ষ্মী ভয় পাইল, কহিল, “আমাব সব কথাটাই শোন, তারপর বা’ হয় বিচার ক’বে”—

তাল কবিতা লক্ষ্মীর কথাগুলি শিশিবেব উত্তেজিত মস্তিষ্কেব মধ্যে প্রবেশও কবিল না । শিশিবেব অস্থিবেব পদে ছুযাবেব দিকে অগ্রসব হইয়া গেল । লক্ষ্মী প্রমাদ গণিয়া ছুযাবেব দিকে ছুটিয়া গেল, ছুযাবেব বন্ধ কবিবাবেব পূর্বেই শিশিবেব কক্ষ হইতে নির্গত হইয়া গেল ।

লক্ষ্মী সেই অমুজ্জ্বল আলোকিত কক্ষবেব মধ্যে অনেকক্ষণ মূঢ়বেব মতই দাঁড়াইয়া বহিল ।—

এমন সময়ে চঞ্চলপদে কক্ষমধ্যে প্রবেশ করিয়া বিনোদিনী কহিল, “ঠাকুবাবু, শিশিব বাবু কোথায়?—মা ডেকেছেন তাঁকে!”

লক্ষ্মী তখনও নিজেকে ভাল করিয়া সামলাইতে পারে নাই, তাহার পীবববক্ষ তখনও গুরুত্বাসে কম্পিত হইতেছিল; দীপ্ত চক্ষুব প্রান্তভাগ তখনও অশ্রুসজল ছিল।

লক্ষ্মী কোনও উত্তর দিল না দেখিয়া বিনোদিনী কাছে আসিয়া তাহার গা ঠেলিয়া ডাকিল, “কি লা হযেছে কি তোদেব? —জামাইবাবু কোথায়?”

কতকাল পরে স্বামী সম্ভাষণ করিতে আসিয়া লক্ষ্মী যে ভীৰ উপেক্ষা লাভ করিয়াছে, তাহা তাহার অন্তর দেশকে পীড়িত করিয়া তুলিতেছিল; একটা দারুণ লজ্জা যেন তাহাকে বেষ্টন করিয়া ধবিত্তেছিল। স্বামী যে এমন করিয়া চলিয়া যাইবেন, তাহা সে একবারটি মনেও করিতে পারে নাই। বিনোদিনী আসিয়া যখন তাহাকে ডাকিল, তখন লজ্জায়,

## গৌরী

স্বণায়, অপमानে লক্ষ্মীর মাটির সঙ্গে মিশিয়া যাইতে ইচ্ছা হইতেছিল। এ যেন তাহারই অপরাধ, যেন তাহারই সঙ্গে ঝগড়া কবিয়া শিশিব চলিয়া গেল; এবং সে যে কোথায় গেল, এবং কেন গেল, তাহার জবাব লক্ষ্মীকেই প্রত্যেকের কাছে দিতে হইবে!

শিশির আসিবার কিছু পরেই, লক্ষ্মীব যাওয়া সম্বন্ধে যে উত্তর সে সত্যশঙ্কর বাবুর কাছে পাইল, তাহাতেই শিশিব ভিতরে ভিতবে অত্যন্ত উগ্র হইয়া উঠিয়াছিল; কিন্তু গোবীর কাছে সত্যে আবদ্ধ ছিল বলিয়া, সে নম্রভাবে শুধু শুনিয়াই গেল, কোনও মতামত প্রকাশ করিল না।

সত্যশঙ্কর মনে করিলেন, জামাতা তাঁহার যুক্তির মর্ম্ম সম্যক্ উপলব্ধি কবিতে পারিয়াছেন, তাই বিরুদ্ধ মত প্রকাশ করিলেন না।

কিন্তু শাস্ত্রদর্শন ভিন্মুভি়সেব অন্তবমধ্যে যে দারুণ জ্বালা গুমরিতেছিল, তাহা সত্যশঙ্কর বিন্দুমাত্রও অনুমান করিতে পারিলেন না।

লক্ষ্মীর মাতা বিদ্যাবাসিনী যখন কুশল প্রশ্নান্তে ঠিক একই ভাবে লক্ষ্মীর যাওয়ার প্রতিবন্ধকতা বুঝাইয়া দিলেন, তখন শিশিরের ধৈর্য্যচ্যুতি ঘটিতেছিল; কিন্তু সে বাড়ি গুঁজিয়া শুধু



## গৌরী

জামার আস্তিনটা লইয়াই বাস্ত হইয়া উঠিল এবং একবার মাথা তুলিয়া বলিয়া ফেলিল,—“দাদা ও বৌদি বলে দিয়েছেন, নিয়ে যেতে,—নিয়ে যেতেই হবে! আশা করি আপনারা তারই বন্দোবস্ত করে দেবেন; নইলে আমি আজই চলে যাচ্ছি, যখন সুবিধা হয় পাঠাবেন।”—

এ কথার পরও যখন তিনি শিশিরের সঙ্গে গল্পীগ্রামের অস্বাস্থ্যকর জনবায়ু সম্বন্ধে তাঁর আলোচনা করিতে বসিয়া গেলেন, তখন শিশির আর কোনও কথাই কহিল না।

এমন সময়ে দাসী আসিয়া কহিল, “মা, জামাইবাবুকে বৌদিদি ভিতরে ডেকেছেন,”—

বিন্দ্যবাসিনী কহিলেন, “বাও বাবা, বিনোদ বুঝি তোমাকে ডাকছে!”—

দাসীর প্রদর্শিত কক্ষমধ্যে কিছুক্ষণ অপেক্ষা করিয়াই শিশির লক্ষ্মীর দেখা পাইল।

তারপর ভিসুভিয়সের চূড়ার কাছে একবার তাহার অন্তরস্থিত দারুণ জ্বালায় অত্যাঙ্কল শিখা মুহূর্তের জন্য দেখা গেল, পর মুহূর্তেই শিশির কক্ষ হইতে বাহির হইয়া আসিল।

ব্যাপারটা যাহা ঘটয়া গেল, তাহাতে শিশিরকে বিশেষ দোষী করা চলে না। ধনীর একমাত্র দুহিতাকে বিবাহ

## গৌরী

করিয়াছে বলিয়াই, শিশিব যে তাহার আত্মসম্মান জ্ঞানকে কোনও অংশে এতটুকুও কুণ্ঠিত করিয়া রাখিবে, ইহা সে কিছুতেই সম্বন্ধ করিতে পাবিত না। বরং অনেকস্থলে আত্মসম্মান জ্ঞানটা কোনও মতেই যাহাতে এতটুকুও ব্যাহত না হইতে পাবে, সেজন্য সে আপনাকে ক্রমাগতই সতর্ক, সজাগ করিয়া রাখিত !

লক্ষ্মী বিতর্কের দিকে না যাইয়া যদি সহজ, সরলভাবে শিশিরের হাতে ধরা দিত, ব্যাপাবটা কখনই এমন অপ্রীতিকর হইয়া উঠিত না। লক্ষ্মী যদি সেই দিনই বিনাবাক্যব্যয়ে চলিয়া আসিবার জন্য প্রস্তুত হইতে পাবিত, অথবা প্রথম আলাপের মুহূর্ত্তেই, কোথায় শিশিবেব আঘাত লাগিয়াছে, তাহা বুঝিয়া, নাবীর কোমল হস্তে প্রলেপ প্রয়োগ করিতে পাবিত, তাহা হইলেও এমন একটা অনর্থ ঘটিত না !

বিনোদিনী আবার ডাকিল, কহিল, “বুঝি একটা অনর্থ ঘটিয়েছি ;—কি করেছি সর্বনাশ, বলনা লক্ষ্মী !”

লক্ষ্মী রুদ্ধ কম্পিতস্বরে কহিল, “কিছু করিনি আমি,— শুধু ভাবছি, এই হীন মেয়েজাতটাকে কেন ভগবান্ সৃষ্টি করেছেন ! এদের একটা কথাও মুখ ফুটে বলবার সাধ্য নেই,—স্বাধীনতা ত যেন নাই-ই,—”

## গৌরী

বিনোদিনী কহিল, “সেজ্ঞা ভগবানের দায পড়েনি যে  
তোর কাছে জবাবদিহি করতে আসবেন!—দেখ, তোর ও  
মামুলি বই পড়া কথাগুলি ছাড়! হিন্দুর ঘরের বউ তুই, তোর  
বাপু এত সব কেন? তা’ যাক, শিশিরবাবু কোথায়?  
খাবারগুলি ও-ঘরে বেখে এসেছি,——”

লক্ষ্মী সংক্ষেপে কহিল, “চলে গেছেন।”

তীব্র বিষয়পূর্ণ দৃষ্টি লক্ষ্মীর বিবর্ণ মুখের উপর স্থাপন  
করিয়া বিনোদিনী কহিল, “চলে গেছেন!—সে কিবে?”

“কি করব, আমি ত আর ধবে বাখতে পাবিনে?”—  
লক্ষ্মীব স্বব অপমান ও উপেক্ষাব বেদনায় কম্পিত হইতেছিল।

বিস্মিতা বিনোদিনী তাহাব দুই চক্ষু বিস্ফাবিত করিয়া  
কিছুক্ষণ লক্ষ্মীব মুখের দিকে চাহিয়া বহিল; তাবপর কথিত-  
স্ববে কহিল, “ধবে বাখতে পাশ্লেই বুঝি ভাল হ’ত লক্ষ্মী!—  
ঠাকুব যে কি বুঝেছেন, তা’ তিনিই জানেন। মাও ত তাঁকে  
একটু বুঝিয়ে বলেন না।—মেয়ে তাব শবীব ধুয়ে কি জল  
থাবে? ‘স্নান্য ভাল থাকবে না,’—হাটি ছাড়া কথারে  
বাপু!”

বিনোদিনী ফিবিয়া দুই পা’ দুযাবের দিকে অগ্রসর হইয়া  
গেল।

## গৌরী

লক্ষ্মী ছুটিয়া যাইয়া তাহার অঞ্চল টানিয়া ধরিল, উদ্বেগপূর্ণ-  
কণ্ঠে কহিল, “কি হবে বৌদি ?”

“কি হবে, তা’ আমি কি জানি ?—যেমন তোমাদের  
সৃষ্টিছাড়া বুদ্ধি !—তা’ তুই যেতে দিলি কেন ?”

“তিনি যে চলে গেলেন, আমি কেমন ক’বে বাধা দেব,  
বৌদি ?”

“কচি খুকিটি আর কি ! বাধা দিতে পারলি না ত, সঙ্গে  
চলে গেলি না কেনরে, হতভাগী ?”

বিনোদ বাগিয়া গিয়াছিল ; অঞ্চল টানিয়া লইয়া সিঁড়ির  
উপর দিয়া ‘হুম্ হুম্’ করিয়া নামিয়া গেল !

লক্ষ্মীর দুই চক্ষু অশ্রুপূর্ণ হইয়া উঠিল ।

পিতাব আদরিণী, মাতার সযত্নবর্দ্ধিতা লক্ষ্মী, জীবনে  
কোনও দিন আঘাত পায় নাই, ব্যথা জানে নাই ; আজ  
একটা অননুভূতপূর্ব বেদনায় তাহার অন্তর পরিপূর্ণ হইয়া  
উঠিতেছিল !

কে ঐ তেজগর্ভিত, অভিমানদীপ্ত যুবা, যে এই ধনীর  
দুলালীর বুকের উপর দিয়া উদ্দাম গতিতে চলিয়া গেল ! অথচ  
তাহারই জন্ত অন্তরের কোন্ একটা অনির্দিষ্ট স্থান নিবিড়  
বেদনায় পীড়িত হইয়া উঠিতেছে ! তাহার এই অনাহুত পীড়নও

## গৌরী

যেন প্রীতিতে নন্দিত, সোহাগে বিগলিত ! মাতার স্নেহ, পিতার  
আদরও যেন ইহার কাছে কুণ্ঠিত হইয়া পড়িতেছিল !

এমন করিয়া ত লক্ষ্মী কোনও দিন ভাবে নাই ; এমন  
করিয়া বেদনার পীড়ন লাভ করিয়াও ত সে কোনও দিন এত  
তৃপ্তি পায় নাই ! আজ তাঁহারই প্রদত্ত বেদনাটুকু লক্ষ্মীর কাছে  
একটি পরম গোপন সম্পদের মত মনে হইতেছিল !

লক্ষ্মী ভাবিল, সত্যই বুদ্ধি তাহার শিশিরের সঙ্গে, কোনও  
দিকেই না চাহিয়া চলিয়া যাওয়া কর্তব্য ছিল !

তখন সে দুই হাতে মুখ ঢাকিয়া যেখানে শিশির মুহূর্তপূর্বে  
দাঁড়াইয়াছিল, সেইখানেই ভুলুষ্ঠিত হইয়া পড়িয়া কাঁদিতে  
লাগিল !

বিজয়ার প্রায় দুই সপ্তাহ পবে একদিন দুপুরে লক্ষ্মী তাহার চিঠির বাস্কেটটা খুলিয়া কাগজপত্রগুলি গুছাইতেছিল। কিছু দূরে বসিয়া বিনোদিনী পান সাজিতেছিল। একটা দাসী ঘরের মধ্যে একবার কাজের অছিলায় প্রবেশ করিয়া বিনোদিনীর কাছ দিয়া ঘুরিয়া গেল। যাইবাব সময় মৃদুস্ববে কহিল, “ও-ঘবে কে এসেছে, একবারটি দেখে এস গো, দিদিমণি—!”

বিনোদিনী হাতের পানটা বাটায়া রাখিতে রাখিতে চক্ষু তুলিয়া দাসীর মুখের দিকে চাহিল, কহিল, “কেনবে, সুখি, তুই বুঝি পানগুলি তৈরী করিতে চাচ্ছিস্?”

সুখদা ওরফে সুখময়ী বিনোদিনীর খাস দাসী, বিনোদিনীর বিবাহের পব তাহার পিতা এই চতুৰা দাসীটিকে মেয়েৰ সঙ্গে পাঠাইয়াছিলেন।

বিনোদিনীকে কোনও কাজ করিতে দেখিলে সুখদা অত্যন্ত চটিয়া যাইত। আজও তাহার কথা শুনিয়া বিনোদিনী

## গৌরী

মনে করিল, সুখদা তাহাকে উঠাইয়া দিয়া তাহার হাতের কাজটা করিয়া রাখিতে চাহে ।

বিনোদিনীর কথা শুনিয়া সুখদা তাহার দুই চক্ষু বিস্তৃত করিয়া কহিল, “না গো না, তোমার যত ইচ্ছে তুমি কাজ কর, —আমরা হ’লেম দাসী-মাছুষ, আমাদের অত কাজের স্কে চ’লবে কেন ?”

সুখদা রাগিয়া চলিয়া যায় দেখিয়া বিনোদিনী হাসিতে হাসিতে কহিল, “না, তা’ বলিনি । ওরে, ও ফ্লেপি, শোন্,— কথা শোন্ !—”

সুখদা খানিকটা দূর চলিয়া গিয়াছিল, ফিরিয়া আসিতেছে দেখিয়া বিনোদিনী বাটার পানের উপর এলাচির দানা রাখিতে লাগিল ।

লক্ষ্মী একথানা চিঠি খুলিতে খুলিতে কহিল, “তা সত্যিই ত বোঠান্, তুই অত খেটে মরিস্ কেন, বল্ ত ? দাসীগুলো বসে বসে কাটায়, আর তোর বাপু কাজই ফুরায় না !——”

বিনোদিনী হাসিয়া কহিল, “কি জানি, কাজ না করে আমি ত থাকতে পারি না । আর এ পান টান গুলো সাজা, এ এমনই বা কি কাজ ! ——”

## গৌরী

সুখদা আবার কক্ষমধ্যে প্রবেশ করিল ; লক্ষ্মী কহিল,  
“তা এ গুলো ওবাও ত বেশ কর্তে পাবে—”

“—পায়বে না কেন ?—পারে,—তবে - ”

“তবে কি ?”

বিনোদিনী একটু নিঃশব্দে কহিল, “কি জানিস্, উনি যে  
আর কারু হাতের পান খেতে ভাল বাসেন না, তাই—”  
বিনোদিনী হঠাৎ চুপ করিল। তাহার সুগোর কপোলের কাছ  
দিয়া একটা ক্ষত শোণিতোচ্ছ্বাস মুহূর্তের জন্ত দেখা গেল !  
একটু চঞ্চল, কম্পিত হস্তেই পানের খিলিগুলি তৈয়ারী কবিতা  
কতক একটা ডিবার মধ্যে, কতক বাটার উপরেই রাখিতে  
লাগিল।

বিনোদিনীর কথা শুনিয়া লক্ষ্মী একটু কি ভাবিল, তারপৰ  
একবার বিস্মিত-দৃষ্টিতে বিনোদিনীর লজ্জারক্ত সুন্দর মুখখানির  
দিকে চাহিয়া দেখিল।

—“তা কোন কাজই ত বাদ দিস্নে, বোঠান্। জুতো-  
শেলাই থেকে চণ্ডীপাঠ সবই ত করিস্,—বাম্নী তাড়িয়ে পাকের  
ভার নিয়েছিস্। এখন ঝিগুলি তাড়িয়ে দিবে বাসন-মাজা  
ঘর-নিকানোটোও আরম্ভ কর্ !”

বিনোদিনী পান-গুছান শেষ করিয়া উঠিয়া দাঁড়াইতে



## গৌরী

দাড়াইতে কহিল, “তা’ দোষ কি, পরের বাড়ী ত করতে বাইনে ; মেয়েমানুষ হয়ে জন্মেছি, নিজের হাতে গুছিয়ে, পাক করে যদি স্বস্তর দেওরকে না খাওয়াতে পার্লাম, তা হ’লে আর সুখ কি ?”

বিনোদিনীর কথাগুলি লক্ষ্মীর বুকের ভিতরে কোন একটা অনির্দিষ্ট তন্ত্রীতে মৃদু আঘাত করিতেছিল ! সে আঘাতে, একটা অননুভূতপূর্ব বেদনার সুর রহিয়া রহিয়া বুকের মধ্যে সাড়া দিয়া উঠিতেছিল। বেদনাটা যে কিসের, লক্ষ্মী ভাল কবিয়া বুঝিতে পারিতেছিল না।

একটা হাসির সৃষ্টি করিয়া তুলিয়া বেদনাটুকুকে দূর করিবার জন্য লক্ষ্মী জোর করিয়া কহিল, “তো’র ত আর দেওর নাই—?”

—“দেওর না আছে, দেওরের মত নন্দ ত তুই রয়েছিস—?”

সুখদা লোভ সম্বরণ করিতে না পারিয়া বলিয়া উঠিল, “তা’ দেওরের দাদাও ত রয়েছেন, তাঁর কাজগুলি দাসী বাদীর হাতে ছেড়ে দিতে দিদিমণি আমার একেবারেই নারাজ যে গো !”

“দূর পোড়ারমুখী !—তুই ভারি বেড়ে গেছিস্ কিস্ত !”

## গৌরী

সুখদাকে গালি দিতে যাইয়াও বিনোদিনী অঞ্চলে মুখ চাপিয়া হাসিতে লাগিল ।

সুখদা বিনোদিনীর প্রায় সমবয়স্কা ; সে বিশ্বাসী এবং নিম্নগুণে বাড়ীর সকলেরই প্রিয়পাত্রী । বিনোদিনী তাহার প্রতি সখীর জ্বায়ে আচরণই কবিত বলিয়া সুখদা কথাবার্তায় কতকটা স্বাধীনতা গ্রহণ কবিত । সেজন্য কেহই এই চতুৰা দাসীটির প্রতি অসন্তুষ্ট হইত না ।

লক্ষ্মী হাসিতে চেষ্টা কবিল, কিন্তু হাসিতে পাবিল না । বুকের মধ্যে একটা বেদনা থাকিলে, হাসিবাব সময় সেই বেদনাটা বেশীই বাজিয়া উঠে ।

এমন সময় কক্ষমধ্যে আব একজন দাসী প্রবেশ কবিয়া বিনোদিনীর দিকে চাহিয়া কহিল, “বৌঠাকরুণ, মাঠাকরুণ আপনাকে ডাকছেন—”

দাসীর কথা শুনিয়া সুখদা কহিল, “আমাব কথা ত বিশ্বাস কবনি, দিদিমণি । এখন দেখে এস কে এসেছেন ।”

বিনোদিনী একটু হাসিয়া নবাগতা পবিচারিকাটিকে কহিল, “মার কাছে কে এসেছেন রে, ক্ষান্ত ?”

“চিনি না ত বৌঠাকরুণ ।”

বিনোদিনী পানের বাটাটা তাকেব উপর তুলিয়া রাখিয়া,

## গৌরী

একটা পান লইয়া মুখে দিল ; সুখদা রাগ করিয়া কহিল, “ও কাজটুকুও কি আমরা পারতাম্ না, দিদিমণি ?”

বিনোদিনী যাইতে যাইতে কহিল, “কোন্ কাজটা রে সুখি, পান খাওয়াটা না কি ? তা’ খা না—বাটায় ত রয়েছে,”—সুখদা আরও রাগিয়া বিড়্ বিড়্ করিয়া বকিতে বকিতে চলিয়া গেল। ফাস্ত-ঝি আঁচলে মুখ চাপিয়া ক্রমাগত হাসিতেছিল,—লক্ষ্মীর দিকে ফিরিয়া সে কহিল, “শুনলে, দিদিমণি, বোঠাকরুণের কথা ! শুনলে হাস্তে হাস্তে পেটের বত্রিশ নাড়ীৰ বাঁধন ছেঁড়ে ! আর ওই পাগলটাকে না ক্লেপালে বোঠাকরুণের যেন এক দণ্ডও কাটে না।”

ফাস্ত চলিয়া গেল।

লক্ষ্মী চুপ করিয়া বসিয়া রহিল ! তাহার মনে হইতেছিল, এই হাসির সঙ্গে তাহার বোগদান করিবার অধিকারটুকু কে যেন হরণ করিয়া লইয়াছে !

বাস্তবের চিঠিপত্রগুলি অন্তমনস্কভাবে নাড়িতে নাড়িতে, একখানি অনেক দিনের পুরাতন চিঠির দিকে তাহার দৃষ্টি পড়িল। চিঠিখানি শিশিবের,—বিবাহের পর প্রথম বিজয়ার আদর ও সোহাগ সেই নাতিদীর্ঘ লিপিখানি বহন করিয়া আনিয়াছিল !

## গৌরী

লক্ষ্মী একবার চিঠিখানি পড়িল, আবার পড়িল ; বুকেব ভিতর একটা অব্যক্ত যাতনা ক্রমেই বাড়িয়া উঠিতেছিল ; কোনও মতেই যেন তৃপ্তি পাইতেছিল না ! চিঠিখানি সে যখন তৃতীয়বার পড়িয়া শেষ করিল, তখন তাহাব দুই চক্ষু অশ্রুপূর্ণ হইয়া উঠিল । বাঙ্কুলিপুস্পরক্ত অধবপুট উচ্ছ্বসিত আবেগে মৃদুকম্পিত হইতে লাগিল !

শিশিব যদিও বাগ কবিয়া চলিয়া গিয়াছিল, তবু এবাবও লক্ষ্মী আশা করিয়াছিল, অন্ততঃ এই একটি বিশেষ দিনে—এই বিজয়ায়—যে দিনে শত্রু শত্রুকে ক্ষমা কবে—এই প্রীতিব ভাণ্ডাব লুপ্তিত করিয়া বিলাইবার দিনটিতে—শিশিবেব অমৃত্ত প্রেম একখানি ক্ষুদ্র লিপিব ভিতর ধরা দিয়া তাহাকে আনন্দিত করিবে ! দিনের পর দিন লক্ষ্মী তাহার ব্যর্থ আশা লইয়া বসিয়া রহিয়াছে, কিন্তু নির্ভুর শিশির লক্ষ্মীকে শুধু দুইটি ক্ষুদ্র অক্ষরের ভিতব দিয়াও জানায় নাই যে, সে তাহাকে অন্ততঃ একটি দিনের জন্তও ক্ষমা করিতে পারে ।

লক্ষ্মী একবার ভাল করিয়া নিজের অন্তরের দিকে চাহিয়া শিহরিয়া উঠিল । এ কোন্ রসহীন মরুর মধ্যে সে আপনার তৃষিত চিত্তকে আনিয়া ফেলিয়াছে ! মুহূর্ত্তেব জন্ত মায়ামরীচিকা রচনা করিয়া দিয়া যে লুকাইয়াছে, তাহাকে এই রসহীন মরুব

## গৌরী

মধ্যে কোথায় সে খুঁজিয়া পাইবে ? হৃদয়ের এ অভাবকে যে দূর করিতে পারে, এ পক্ষিল দৈন্তকে ডুবাইয়া, লুকাইয়া রাখিতে পারে, এ তৃষ্ণাকে যে শাস্ত করিতে পারে, সে কোথায় !—সে কোথায় !

বিনোদিনীর প্রবল কস্ম্প্‌হার মধ্যে আজ লক্ষ্মী যে তথ্যের সন্ধান পাইয়াছিল, তাহা তাহার কাছে একেবারেই নূতন । সে এতদিন নিজের দিক দিয়াই স্বামীকে চিনিতে শিখিয়াছে ; স্বামীর দিক দিয়া নিজেকে চিনিতে শিখে নাই ।

এতকাল যেন একটা দীর্ঘ পার্শ্বতাপথ অতিবাহন করিয়া আসিয়া, আজই যেন, এক অপ্রত্যাশিত মুহূর্ত্তে, সে এমন একটি ফল-পুষ্প-স্রোতস্বিনী-বহুল শ্রামায়মান উপত্যকার সম্মুখে আসিয়া দাঁড়াইয়াছে, যেখানে তাহার ক্ষুধা, তৃষ্ণা, অভাব, দৈন্ত, সকলই নিঃশেষিতরূপে মিটিয়া যাইতে পারে !—কিন্তু ঐ উপত্যকায় প্রবেশ-পথের চাবিকাঠিটি তাহার কাছে, সে ত তাহাব পার্শ্বে নাই ; কাছে নাই,—যত দূর দৃষ্টি চলে তাহার মধ্যেও ত তাহাকে দেখা যায় না, খুঁজিয়া পাওয়া যায় না ! লক্ষ্মী বুকিল, এমন করিয়া দিন কাটিবে না । নারীর দিন এমন করিয়া কাটিতে পারে না ! কিন্তু কোথায় শ্রেয়পথ, ধনীর দুলালী চোখের জলে তাহাও ভাল করিয়া দেখিতে পাইতেছিল না ।

## গৌরী

হাতের চিঠি বাস্কে তুলিয়া রাখিয়া অঞ্চলে চক্ষু মার্জনা করিয়া লক্ষ্মী উঠিয়া দাঁড়াইল। খোলা ছয়ারের দিকে দৃষ্টি পড়িতেই লক্ষ্মী দেখিল, সেখানে এক হস্তপ্রফুল্লমুখী নারী দণ্ডায়মান রহিয়াছে ; তাহার নয়নে স্নেহ-স্রাবী দৃষ্টি—অধর-প্রান্তে মৃদু হাসির রেখা !

লক্ষ্মী সবিস্ময়ে চিনিল, সেই নারী গৌরী !

সেদিন সন্ধ্যার পর বাসায় ফিরিয়া আসিয়াই শিশির বুকিল, বাসায় নূতন লোক আসিয়াছে। সদব দরজার কাছেই চাকবের ঘব; শিশির চাকবকে ডাকিয়া জিজ্ঞাসা করিল, সত্বেব পাইল না। বুকিল, সন্ধ্যাব গাড়ীতে কাহার আসিয়াছে। সিঁড়িতে আলো ছিল না। অন্ধকারে কিছুক্ষণ দাঁড়াইয়া থাকিয়া কাহাব অস্পষ্ট কণ্ঠস্বব সে শুনিল। সে স্বর যাহার অনুমান হইল, শিশিব দেখিল সংবাদ না দিয়া তাহার আসা একেবারেই অসম্ভব। বিস্মিত কোতূহলে শিশিব ধীরে ধীরে সিঁড়ি বাহিয়া উপবে উঠিয়া আসিল।

দুগাবের কাছে দাঁড়াইয়া শিশিব দেখিল, কক্ষমধ্যে কেহ একথানা বড় থালাব উপব কতকগুলি খাবার গুছাইয়া সাজাইয়া রাখিতেছে। বিস্মিত-কণ্ঠে শিশিব ডাকিল “বৌদি!”

হাস্তমুখী গোবী শিশিবের দিকে ফিরিতেই শিশির দ্রুতপদে কক্ষমধ্যে প্রবেশ করিল। সে যে কি করবে কিছুই বুঝিতে পারিতেছিল না।

## গৌরী

“তুমি, বোদি, তুমি কখন, কেমন করে এলে ? এ যে আমার স্বপ্ন বলেই মনে হচ্ছে যে !——”

গৌরী হাসিয়া কহিল, “জুতোটা ছেড়ে এই পিঁড়িটার উপরে বস ত দেখি ; খাবারগুলির সঙ্গে একটা পরিচয় স্মরণ করে দিলেই বুঝতে পারবে এখন, যে আমাদের আসাটা ঠিক স্বপ্নই নয়, শিশির ।”

“‘আমাদের’ বলছ, তা হলে তুমি একলাটি আসনি বোদি !”

“বাঃ ! আমি একলাটি আস্ব কেমন করে শিশির ?” গৌরীর হাত-তরল কণ্ঠস্বর শুনিয়া শিশিরের অতর্কিত বিস্ময়ের ভাবটা অনেকটা কাটিয়া গেল !

“সত্যি বোদি, আমি কি যে করব, আর কি যে বলব, কিছুই ঠিক পাচ্ছিনে । এমন হঠাৎ ছাদ ফুঁড়ে যে তোমরা এখানে এসে নামবে, তা আমি স্বপ্নেও মনে করতে পারিনি, এ যেন একেবারে সেই ‘দেবগণের মর্ত্যে আগমনের’ মতই একটা মস্ত বিস্ময়কর ব্যাপার ।” শিশির ক্রমাগতই বকিয়া যাইতেছিল । গৌরী বাধা দিয়া কহিল, “ওসব কথা খাবার-গুলির সন্ধ্যাবহার করতে করতেই বল, শিশির । এর পরে বাজার থেকে এলে আমি আবার রান্ধিতে যাব ।”



## গৌরী

শিশির খাবার মুখে দিতে দিতে কহিল, “বাজার থেকে কে আসবে ?”

গৌরী হাসিয়া উঠিল। অপ্রতিভ-স্বরে শিশির কহিল, “এই দেখ, আমি কি যে ছাই বকে যাচ্ছি ! দাদার কথাটা একবারটি জিজ্ঞাসাও করিনি,—তিনি——”

“বাজারে গেছেন, এখনি ফিরবেন, তোমার যে গেরস্তালী এমনি করেই না কি শরীর বাঁচিয়ে বিদেশে থাকবে ?”

“এর মধ্যে আমার গৃহস্থালীটা দেখে নিয়েছ বোদি ?”

“হাঁ, তোমার তরকারীর চুবড়ি, ডালের হাঁড়ি, তেলের ভাঁড়, কিছুই আমার দেখতে বাকী নেই শিশির !”

শিশির খাইতে খাইতে একবার ঘরটার চারিদিক দেখিয়া লইল। “বা রে ! তুমি এত কখন করলে ? আমার ঘরের দু-বছরের জঞ্জাল যে তুমি দু-ঘণ্টায় সাফ্ করেছ !” গৌরী দেশ হইতে কিছু তরকারি সঙ্গে আনিয়াছিল, সেগুলি বাহির করিয়া লইয়া কুটিতে আরম্ভ করিল। একটা কথা তাহার মুখে আসিয়া বাধিয়া যাইতেছিল, একটু ইতস্ততঃ করিয়া, একটু মুহূ হাসি জোর করিয়া ঠোঁটের কাছে আনিয়া ধীরে ধীরে গৌরী কহিল, “ইঃ ! দু-ঘণ্টার মধ্যে এত জঞ্জাল সাফ্ করা কি আমার কৰ্ম্ম শিশির ? আমার চেয়েও সব

## গৌরী

কাজ যে সহস্রগুণে সুন্দর করে করতে পারে, সেই লক্ষ্মীর সাহায্য না পেলে এত আমি একলাটি কিছুতেই করে উঠতে—”

কথা শেষ করিবার পূর্বেই গৌরী চক্ষু তুলিয়া একবার শিশিরের মুখের দিকে চাহিয়া দেখিল; গুরু-আঘাত পাইলে মানুষ যেমন কিছুক্ষণ একবারে নির্ঝাক হইয়াই থাকে, এবং তাহার মুখশ্রী যেমন একেবারেই রক্তশূন্য হইয়া যায়, শিশির তেমনি আহতের মতই আন্তর্দৃষ্টিতে গৌরীর মুখের দিকে চাহিয়া রহিয়াছে! তাহার ললাটের উপর দিয়া ঘর্মবিন্দু দ্রুত কুটিয়া উঠিতেছিল। খাবারের থালার উপর শিথিলমুষ্টি দক্ষিণ হস্ত রক্ষা করিয়া সে যখন সম্মুখের দিকে কতকটা নুঁকিয়া পড়িল, তখন হাতের তরকাবী ফেলিয়া দিয়া গৌরী শিশিরের কাছে ছুটিয়া আসিল। পশ্চাৎ হইতে তাহাকে কোলের কাছে টানিয়া রাখিয়া গৌরী ত্রাসকম্পিতকণ্ঠে ডাকিল, “শিশির! ও শিশির!—ও লক্ষ্মী! জল নিয়ে আয়, শিশির যে কেমন হয়ে পড়ল—”

শিশির হঠাৎ উঠিয়া সোজা হইয়া বসিল, এবং তীব্র-কণ্ঠে কহিল, “না, না, কারু জল আনতে হবে না!”

গৌরী কোমল-কণ্ঠে কহিল, “ছি শিশির, এত দুর্বল তুই!”

“না, না, আমি দুর্বল নই, বোদি! তোমরা নিজেদের

## গৌরী

উপর अपमानটাকে टेने নিয়ে আমাকে যে কতখানি ব্যথিত করে তুলেছ, তা যদি বুঝতে, তা' হলে আজ এমন করে—”

“তোমার ব্যথা আমি বুঝিনি, শিশির! একথা তুই যে স্বপ্নেও ভাবতে পারিস, তা' আমি মনে করিনে! ব্যথাটাকে নিজের বুকের মধ্যেই পুষে না রেখে, যদি আমার সঙ্গে ভাগ নিতে পারিস, তাই মনে করেই আজ তোমার কাছে ছুটে এসেছি শিশির!—আজ তুই এমন অবসন্ন হ'য়ে পড়লে চলে কই?”—উচ্ছ্বসিত অশ্রুর আবেগে গৌরীর কাতর কোমল স্নেহজড়িত কণ্ঠস্বর রুদ্ধ হইয়া আসিল।

পাশের কক্ষ হইতে জল লইয়া লক্ষ্মী দুয়ারের কাছ পর্য্যন্ত আসিয়াছিল, শিশিবের কথা শুনিয়া থমকিয়া দাঁড়াইল। একটা প্রবল ধিকারে তাহার চক্ষু দুইটি মুহূর্তের জন্য দীপ্ত হইয়া উঠিল, তারপরই গুণ্ঠনপ্রাপ্ত দিয়া অশ্রুমার্জনা করিয়া লক্ষ্মী ফিরিয়া গেল। একটা ভাঙ্গা চেয়ারের উপর মাথা রাখিয়া স্তব্ধের মতই পড়িয়া রহিল।

ভাটার জল নামিয়া যাওয়ার সঙ্গে সঙ্গেই যেমন নদীর তিতরকার পঙ্কচিহ্ন জাগিয়া উঠে এবং জানাইয়া দেয় যে, জোয়ারের জলে ঢাকা থাকিলেও ঐ মলিন পঙ্ক-চিহ্নটা একটা সত্যকারই জমাটবাঁধা ক্লেদ, বহুদিন হইতে রহিয়াছে ; তেমনি আজকার উচ্ছ্বাসের আবেগটা কমিয়া যাইতেই, মনের তিতরকার অন্তহীন বেদনার আবিল চিহ্নগুলি সর্বপ্রথমেই শিশিরের চোখে পড়িয়া গেল ! এগুলি যে ঠিক আজকার নহে, কত দিন পূর্ব হইতেই একটু একটু করিয়া জমিয়া উঠিয়াছে ; একথাটা মনে করিয়া সে শিহরিয়া উঠিল !

এই আবিলতার নীচে তাহার প্রাণটা যে একেবারেই হাঁপাইয়া উঠিয়াছে, এবং সে যে কোনো মতেই স্বস্তি পাইতেছে না, এটা তো নিঃসন্দেহই একটা নগ্ন সত্য !

এলার্শ্বে ওয়ালা ঘড়ি নিয়মমত চলিতে চলিতে হঠাৎ একসময়ে এলার্শ্বে বাজিয়া উঠিয়া যেমন একটা বিশেষ মুহূর্ত্তকে জানাইয়া দিয়া আবার নিজের মনে চলিতে থাকে, আজকার এ ব্যাপারটাও কতকটা ঠিক তেমনি ভাবে ঘটিয়া গেল ।

## গৌরী

বাড়ীমুখ সকলের মনেই আজ একযোগে এই কথাটাই জাগিয়া উঠিয়াছিল যে, এভাবে আর চলিতে পারে না, এবং ঠিক এই মুহূর্ত হইতেই আগেকার ক্রটি-বিচ্যুতি, ভুলচুকগুলিকে আর বাড়িতে না দিয়া, হয় একটা নূতন পথ এখনই ধবিত্তে হইবে ; না হয়, পরস্পরকে সকল দাগিত্ব হইতে মুক্তি দিয়া একেবারেই মুখ ফিরাইয়া বসিতে হইবে !

মাসুকের জীবনে এই মুহূর্তটাই সর্বাপেক্ষা শুভ বা অশুভ মুহূর্ত ! এই সন্ধিক্ষণেব উপর ভবিষ্যতেব ছোট বড় সকল ব্যাপারই নির্ভর করিতেছে ! এবং জীবনেব অপ্রীতিকর ব্যাপারগুলি এমনি একটা মুহূর্তে পৌছিয়া গেলেই চূড়ান্ত মীমাংসা সহজেই আসিয়া পড়ে !

তখন এই মীমাংসার জন্য কোনও একটা আয়োজনেবও যেমন দরকাব হয় না, তেমনি কাহাকেও কিছু বলিয়াও দিতে হয় না এবং সব চেয়ে বড় কথা এট যে, ইচ্ছিতেব অপেক্ষায় যে যাহার স্থানটা দখল করিয়া দাঁড়াইয়া রহিয়াছে, ইহাও দেখা যায় !

এ ঘবটাব মধ্যে লক্ষ্মী একলাটী অনেকক্ষণ চুপ করিয়া বসিয়া বহিল । শিশিব তাহাকে যে আঘাত করিয়াছে, আজ আর সে তাহার সমালোচনা করিতে বসিল না ; বার বার শুধু

## গৌরী

এই কথাটাই মনের মধ্যে নাড়াচাড়া করিতে লাগিল, যে, এর একটা শেষ হওয়া দরকার হইয়া পড়িয়াছে ; এতদিনকার ভুলের প্রায়শ্চিত্ত, যে ভাবেই হউক, আজই হইয়া গেলে বাঁচা যায় !

মনের মধ্যের দাগগুলিকে মিলাইয়া দেওয়াই আজ যে সব চেয়ে বেশী প্রয়োজন হইয়া পড়িয়াছে, এ কথাটা এই মুহূর্তের পূর্বে এমন করিয়া আর কোনও দিন সে অমুভব করে নাই !

পাশের ঘরে দুই ভাইয়ের এবং গৌরীর কণাবর্ত্ত চলিতেছিল। তাহার মৃদু শব্দ লক্ষ্মীর কাণে আসিতেছিল। কিন্তু সে দিকে মোটেই তাহার মন ছিল না।

জ্ঞানালার কাছটাতে উঠিয়া আসিয়া বাহিরের আকাশের দিকে নির্নিমেষ চোখে কতক্ষণ চাহিয়া ছিল, তাহা তাহার জ্ঞান ছিল না ; কিন্তু চাহিয়া চাহিয়া যখন দুই চোখ জালা করিয়া উঠিল, তখন সে মুখ ফিরাইয়া লইল।

নির্মল আকাশ তখন লক্ষ মাণিক্যচিত্র চন্দ্রাতপের শোভা পাইতেছিল এবং এই গরম বিচিত্র আচ্ছাদনটির নিম্নেই বিপুল পৃথ্বী সুষ্প্ত রহিয়াছে।

কর্ষ-কোলাহল ধামিয়া গিয়াছে ; শুধু উদ্দাম বায়ু-

## গৌরী

প্রবাহ মাঝে মাঝে ছুটিয়া আসিয়া ঘরের দরজা জানালার কবাট-  
গুলির উপর মাথা খুঁড়িয়া যাইতেছে ।

মুখ ফিরাইতেই লক্ষ্মী দেখিল, এই ঘরের দিকেই গৌরী  
আসিতেছে ।

ছয়ারের দিকে সরিয়া আসিয়া সহজ-কণ্ঠে কহিল, “তুমি  
এসেছ দিদি, একলাটা বসে বসে সত্যি হাঁপিয়ে উঠেছি যে  
ভাবলাম আমাকে ভুলেই বা গেলে ।”

কথাগুলি বলিতে গলাটা ধরিয়া আসিতেছিল ; তবু জোর  
করিয়া হাসিয়া কহিল, “কিন্তু তোমার মতলবও আমি কিছু  
বৃদ্ধিতে পারলাম না দিদি ! বাড়ী যাবার পথে তোমার এই  
বাসাবাড়ীটাও যে পড়বে, তা’ আমায় একবারটাও জান্তে  
দাওনি তো !”

বলিয়াই মুহূর্তের জন্য গৌরীর মুখের উপর চোখ দুটা  
তুলিয়া ধরিল ।

আজ এই মুহূর্তে লক্ষ্মীর মনের কথাটা গৌরী ঠিকই  
বুঝিয়াছিল, তাই চোখের পাতা জলে ভিজিয়া উঠিলেও লক্ষ্মীকে  
টানিয়া বুকের কাছে আনিয়া হাসিমুখে কহিল, “এই মেয়ে মানুষ  
জাতটাকে যে অনেক কিছু সহ্য করে চলতে হয়, এ জাতের  
পাঁচ বছরের মেয়েটাও যে সে খবর রাখে, এটা তো পুরুষরা

## গৌরী

একেবারেই বোঝে না, লক্ষ্মী ! ওদের মান অভিমান গর্ব সব  
এ জাতের কাছে হার মেনে যাবেই, যদি এ জাতটা একটু সহ্য  
করে, একটু বুদ্ধি খাটিয়ে চলতে পারে ! তোর ভুলচুক কিছু  
হয়েছে এ আমি কোনো দিনই মনে করিনি, আমার যত ভয়  
ঐ শিশিরকেই নিয়ে !” বলিয়াই একটু চুপ করিয়া থাকিয়া  
হাসিমুখে কহিল, “আর ওকে নিয়ে এই এতটুকু কাল থেকে  
আমিই কি কম ভুগেছি রে ! আজ তো ও দিগ্বিজয়ী হয়েছে,  
লক্ষ্মী, কিন্তু ওর ছরস্বপনা কি এতটুকুও কমেচে,—কমেনি  
তো ! কিন্তু আমি এও জানি, ওর মত ভালও আর  
কেউ নয় !”—

দুই চোখের পাতা জলে ভিজিয়া উঠিয়াছে ; অধর-প্রান্তে  
মৃদু হাসির রেখা লাগিয়া রহিয়াছে ; এ যে কত বড় গভীর  
স্নেহের পরিচয়, লক্ষ্মী তাহা মনে মনে নিঃসন্দেহ বুঝিয়া রুদ্ধকণ্ঠে  
কহিল, “তোমার পায়ের কাছে এসে দাঁড়াবার আগেই যখন  
আমার সহস্র অপরাধের বিচার তুমি শেষ করে রেখে দিয়েছ,  
দিদি, তখন আমার বলবার আর কিছুই তো রাখনি ! সেদিন  
মুখ ফিরিয়েই বাপের বাড়ীর ঘরের দোরের কাছটিতে যখন  
তোমাকে দেখলাম, তখনই মনে হ’ল, আমার মুক্তির খবর  
তুমি জানিয়ে দিলে ! কিন্তু একটা কথা আজও আমি ঠিক



## গৌরী

বুঝতে পারিনি দিদি, যে তুমি কেমন করে আমার সব অপরাধ ভুলে গেলে এবং ক্ষমা করলে !”

গলার স্বর ধরিয়। আসিতেছিল ; বাঁ-হাতের মুষ্টির মধ্যে ডান হাতের আঙ্গুলগুলি চাপিয়া রাখিয়া সেইদিকে চাহিয়া চাহিয়া কহিল, “বাপের ঐ অতবড় বাড়ীটার মাঝে শুধু একজন ছিল যে আমাকে শত্রু কথা বলবার সাহস রাখত ! সে আমার বৌদি’ ! তাকে আমি ভয়ও করতাম, কিন্তু মনটা মাঝে মাঝে তার উপর অগ্রসর হ’য়ে উঠত ! সে কিন্তু তোমাকে ঠিকই চিনেছিল ! চলে আস্‌বাব দিন সে যখন তোমার হাতে আমাকে ধরে দিয়ে কেঁদে তোমাব বুকেই মুখ লুকাল, তখন আমি তাকেও ঠিক চিন্লাম এবং তোমাকেও জান্লাম ! শুধু তারই একটা কথায় আমি আমার জীবনের শ্রেষ্ঠ পথটি খুঁজে পেয়েছি এবং আমি যে তোমাদের কতখানি ব্যথা দিয়েছি, তাও জেনেছি ।”

লক্ষ্মীর দুই চোখ জলে ভরিয়া গেল । কোনও কথা না বলিয়া গৌরী তাহাকে বুকের কাছে টানিয়া আনিয়া পরম স্নেহে মাথায় হাত বুলাইয়া দিতে লাগিল ।

লক্ষ্মী কহিল, “না চাইতে তোমার ক্ষমা তো পেয়েছিই, দিদি, কিন্তু যা’ না চাইতেই পাওয়া যায়, তা চাইবার স্পৃহা নাকি

## গৌরী

মানুষের আরো বেশী করে হয় ; তাই আজ তোমার কমা আমাকে চেয়ে নিতেই হবে !” বলিয়াই লক্ষ্মী নীচু হইয়া দুই হাতে গৌরীর পায়ের ধূলা মাথায় তুলিয়া লইল ।

লক্ষ্মীকে টানিয়া তুলিয়া গৌরী কহিল, “পাগলামিতে তুই যে আমার শিশিরের চেয়ে একটুও কম বাসনে, তা’ আমি ঠিক বুঝেছি ! ও আমার দেবর হলেও, ও যে ছোট ভাইয়ের মত একেবারেই নয় ; ও যে চিরদিন কোলের ছেলের মতই দুরন্ত রয়ে গেল ! ওর সব অত্যাচার আব্দার যে সহ্য করে নিতে পারবে, সেই, ও যে কত ভাল, তা’ বুঝতে পারবে ! আজ তোকে আমি এই আশীর্বাদই করছি, যে, ওকে চিন্তে যেন তুই কোনো দিনই ভুল করিসনে, লক্ষ্মী !”

গৌরীর বুকের মধ্যে মাথা রাখিয়া লক্ষ্মী চুপ করিয়া রহিল ; তাহার ইচ্ছা হইতেছিল, এই পরম স্নেহশালিনী নারীর দুই পায়ের উপর মুখটা গুঁজিয়া কিছুক্ষণ কাঁদিয়া লয় ।

শটীনের সঙ্গে কথাবার্তা শেষ করিয়া, শিশির যখন তাহার ঘরের মধ্যে টেবিলটার কাছে আসিয়া দাঁড়াইল, তখন রাত প্রায় বারোটা । টেবিলটার উপরকার পরীক্ষার খাতাগুলি আজ আর দেখিয়া উঠা সম্ভব নয় মনে করিয়া ডায়েরীটা টানিয়া লইল এবং সমস্ত দিনের ব্যাপারগুলি লিখিয়া রাখিতে

## গৌরী

গিয়া হঠাৎ শিশিরের মনে হইল, ভুল ভ্রান্তি তাহার নিজেরও যথেষ্ট রহিয়াছে, তবু সে এই যে দিনের পর দিন বিচারকের আসনটিই দখল করিয়া বসিয়া রহিয়াছে,—এ কেন ?

যে তাহার মায়ের চেয়েও বেশী, সে গৌরীকেই সে আঘাত কিছু কম করিয়া করিয়াছে ?

আজকার এই ব্যাপারটাকে এতটা বিশ্রী সেই করিয়া তুলিয়াছে ! এই দুর্বলতার পরিচয় কত দিক দিয়াই তো দিয়াছে, কিন্তু এ সবেই তো একটা সীমা আছে,—শেষ আছে !

লেখা বন্ধ করিয়া দুই হাতের মধ্যে মাথাটা রাখিয়া শিশির চুপ করিয়া বসিয়া রহিল ।

নিস্তরু ঘরটার মধ্যে শুধু দেওয়ালের গায়ের ঘড়িটার টিক্ টিক্ শব্দ স্পষ্ট হইয়া উঠিতেছিল, খোলা জানালার পথে বাতাস বহিয়া আসিয়া শিশিরের উত্তপ্ত কপোলে ললাটে মৃদুস্পর্শ দিয়া যাইতেছিল এবং টেবিল ল্যাম্পটার পাশে পাশে ফুঁ দিয়া আলোটাকে মধ্যে মধ্যে উজ্জ্বল করিয়া তুলিতেছিল ।

সম্পূর্ণে কখন ছয়ারটা খুলিয়া গিয়াছে । ঠিক টেবিলটার কাছটিতেই কাপড়ের ধস্ ধস্ শব্দ শুনিয়া মুখ তুলিয়া চাহিতেই

## গৌরী

শিশির দেখিল, বাহবেষ্টনীর মধ্যে লক্ষ্মীকে টানিয়া রাখিয়া  
স্মিতমুখী গৌরী দাঁড়াইয়া রহিয়াছে !

অপূৰ্ণ হাস্তোজ্জ্বল মুক্তি ! দৃষ্টিতে স্নেহ ও প্রীতি করিত  
হইতেছে ! নিৰ্মল ললাট আলোকলেখ-পাতে স্নিগ্ধ হইয়া  
রহিয়াছে !

শিশির বুঝিল, এই নারীকে কোনও আঘাতই যেন  
বিধে না ; তুচ্ছ মান অভিমান ইহার হাসিকে মলিন করিতে  
পারে না !

এ বাঙ্গালীর ঘরেরই চিরন্তন বধূটি, বিশ্বের অমূল্য মাতৃ-  
মুক্তির প্রতিমার মতই গৃহে গৃহে প্রতিষ্ঠিতা রহিয়াছে !

শিশির চেয়ার ছাড়িয়া উঠিয়া দাঁড়াইয়া কহিল, “তোমার  
মুখে আমার মায়ের মুখের ছায়া এমন করে ফুটে উঠতে দেখি,  
বৌদি’, যে, আমি একেবারে অবাক হ’য়ে যাই !—এ কেমন করে  
হয়, বৌদি’ ?

একটি সরল নয় শিশু তাহার কোতুল মিটাইবার জন্তই  
যেন ছুটিয়া আসিয়া মায়ের কাছে প্রসন্ন করিতেছে !

স্বর্গগতা শাস্তিদির উদ্দেশে যুক্ত হইয়া দুই হাত ললাটে স্পর্শ  
করিয়া হাসিমুখে গৌরী কহিল, “তোকে আমার হাতে দিয়ে  
যাবার সময় তিনি যে আমায় ছুঁয়ে আশীর্বাদ জানিয়ে গিয়ে-

## গৌরী

ছিলেন, শিশির ! তাঁর স্পর্শ বার্থ হতে পারে না ত ! যদি তাঁকে তোর মনেই পড়ে, তা'তে বিশ্বয়ের কিছুই নেই,—তুই যে তাঁরই দেওয়া আশীষ, শিশির !”

দুই চোখের পাতা ভিজিয়া উঠিতেছিল ; একটুকাল চুপ করিয়া থাকিয়া গৌরী কহিল, “সে কথা যা'ক ! লক্ষ্মীর সঙ্গে আমার বোঝা-পড়া হয়ে গেছে, শিশির ! ছোট ছেলের চেয়েও বেশী, পেটের মেয়েও চেয়েও বড় এই লক্ষ্মী,—এই লক্ষ্মীকে সর্বপ্রকারে স্নেহে রাখবার ভার তোমার উপর দিয়ে যাচ্ছি, শিশির ! এ আমার অনুরোধ উপরোধ নয়, আদেশ বলেই জান্বে, বুল্লে ত !”—তারপর ঘরটার চারিদিকটা একবার দেখিয়া লইয়া হাসিয়া কহিল, “ভয় পেও না, গৌসাই, তোমার এই ছোট বাসাটিতে ওকে বেখে যাচ্ছিনে, তা'তে আমিও স্বস্তি পাব না ত ! আর ওকে ছেড়ে থাকা যে আমার কৰ্ম্ম নয়, তা' আমি এই তিন দিনেই বেশ করে জেনেছি !”—বলিয়াই লক্ষ্মীর হাত টানিয়া লইয়া শিশিরের হাতের উপর তুলিয়া দিল এবং পর-মুহূর্ত্তেই ঘর হইতে বাহির হইয়া গেল ।

শিশির চোঁচাইয়া বলিয়া উঠিল, “পাঁচ বছর বয়সের সময় মা চলে গেছিলেন, লক্ষ্মী, আজ এতকাল পরে তাঁকে সাম্নেও

## গৌরী

দেখলাম, তাঁর গলার আওয়াজও শুনলাম! মাঝে প্রণাম কর  
লুম্বী, প্রণাম কর!

গলায় আঁচলটা জড়াইয়া, মুহূর্তপূর্বে যেখানে গৌরী  
দাঁড়াইয়াছিল, ঠিক সেইখানটায় লুপ্তিত হইয়া প্রণাম করিয়া  
লুম্বী যখন উঠিয়া দাঁড়াইল, তখনও শিশির স্তম্ভিতের মতই  
দুয়ারের দিকে চাহিয়া দাঁড়াইয়া ছিল। তাহার দুই গণ্ড  
বাহিয়া চোখের জল নামিয়াছে!

দুয়ারের বাহিরে, বারান্দার অন্ধকারের মধ্যে গৌরী  
অশ্রুসিক্ত দুই চোখ অঞ্চলপ্রান্তে মার্জনা করিতেছিল!

# কয়েকখানি উৎকৃষ্ট পুস্তক

অশ্রমমল্ল—শ্রীযতীন্দ্রমোহন সেনগুপ্ত	২১
ভাগের পুস্তক—বোলজন খ্যাতনামা লেখক-লেখিকা	২১
প্রশান্ত—শ্রীমানিকচন্দ্র ভট্টাচার্য্য	১১০
অবাক—শ্রীশৈলবালা ঘোষজায়া	১১০
অমলা—শ্রীউপেন্দ্রনাথ গঙ্গোপাধ্যায়	২১
স্বস্ত্যুত—শ্রীবিষ্ণুপতি চৌধুরী এম-এ	১০
অশ্রমমল্ল—শ্রীযতীন্দ্রমোহন সেনগুপ্ত	২১
উদাসীর মাঠ—রতীন্দ্রনাথ মৈত্র	১১
বিপর্য্যায়—ডাঃ শ্রীনরেশচন্দ্র সেনগুপ্ত এম-এ	২১০
অমূলতরু—শ্রীউপেন্দ্রনাথ গঙ্গোপাধ্যায়	২১
অনাগত—শ্রীশৈলজানন্দ যুগোপাধ্যায়	১১০
বিহ্বল প্রাণ—শ্রীনরেশচন্দ্র সেনগুপ্ত	১১০
বিরহ-মিলন কথা—শ্রীহীবেন্দ্র বন্দ্যোপাধ্যায়	১১০
দিবাক্ষত্র—শ্রীপ্রবোধকুমার সাহা	১১
ময়ূরাক্ষী—শ্রীসরোজকুমার রায়চৌধুরী	১১০
মুক্তি—শ্রীআশালতা সিংহ	১১০
অফুরন্ত—শ্রীপ্রেমেন্দ্র মিত্র	১১

গুরুদাস চট্টোপাধ্যায় এণ্ড সন্স্

২০৩১১, কর্ণওয়ালিস ষ্ট্রীট, কলিকাতা

# উপহারের ভাল ভাল বই

শ্রীঅচ্যুতকুমার সেনগুপ্ত		শ্রীমাণিক বন্দ্যোপাধ্যায়	
কাক জ্যেষ্ঠাংশ	২১	জন্মনী	২১
জন্মনী জন্মভূমি	১১	অতনী মামী	২১
শ্রীশৈলবালা ঘোষজার		শ্রীপ্রবোধকুমার সাক্তাল	
বিশক্তি	২১০	নবীন যুবক	২১
নমিতা	২১	ভরুণী সঙ্ঘ	২১
শ্রীমণীপ্রলাল বহু		শ্রীসরোজকুমার রায়চৌধুরী	
কল্পলতা	১১০	আকাশ ও মৃত্তিকা	২১
রমলা	১৫	পান্থনিবাস	১১০
শ্রীএমেন্সে মিত্র		শ্রীজ্যোতির্ধরী দেবী	
পুড়ুল ও প্রতিমা	১১০	ছায়া পথ	১১০
রবীন্দ্রনাথ মৈত্র		শ্রীসীতা দেবী বি এ	
পরাভ্রম	১১০	বন্যা	২১০
ত্রিলোচন কবিরাজ	২১	মাতৃ ঋণ	২১
শ্রীপ্রগদীশচন্দ্র গুপ্ত		শ্রীআশালতা সিংহ	
রোমন্থন	২১	পরিবর্তন	১১০
হুলালের দোলা	২১	মুক্তি	১১০
ঔউপেন্দ্রনাথ বোষ এম-এ		শ্রীনরেশ্বর ভট্টাচার্য্য	
দ্বিপ্লব	১১০	পাম্বানপুরী	১১০
দাঃমোদকঃবিঃ		শ্রীযুক্ত বোমকেশ বন্দ্যোপাধ্যায়	
দাঃমোদকঃবিঃ	২১	পথের পথিক	১১০
শ্রীসৌরীন্দ্রমোহন মুখোপাধ্যায়		তারাকর বন্দ্যোপাধ্যায়	
সাহসিকা	২১	নীলকণ্ঠ	১১০

গুরুদাস চট্টোপাধ্যায় এণ্ড সন্স,  
২০৩/১১, কর্ণওয়ালিস্ ট্রাট, কলিকাতা





